

敬業堂詩集

函一

十

冊

敬業堂詩集卷十五

海寧

查慎行

梅餘

雲霧窟集

壬申八月

二月杪抵九江即擬作匡廬之遊因循至秋仲恒齋爲余聚半月糧遂策杖往自化城北登山南下含鄱口循麓而歸凡十餘日得詩七十首身在雲霧中仍恐未識廬山真面目也

遊廬山道中寄恒齋太守

山行宜寂寞獨往翻踟躕一遇同遊人

謂王琴村

決起興有

餘頗累賢地主聚糧辦籃輿曉來風色好初日明烟墟千巖排空來勢若掖以趨但聞空翠裏竹樹聲疎疎我

今心力衰事事不迨初預愁無傑句何以酌匡廬

經周濂溪先生廢祠

尼山大聖人重去父母邦人情非得已孰肯違故常先
生少而孤依舅居丹陽母歿即葬此後乃官南康官貧
久不歸遷柩於九江仁心重廬墓卜築匡山傍托名寓
濂溪中豈忘故鄉同時往還輩無若蘇與黃猶不諒此
意作詩徒誇揚我來千載後拜公謁祠堂荒畦被秋禾
四野烟茫茫溢城賢太守爲政持大綱度地面三峯種
蓮池中央煌煌謚告石舉廢今方將時恒齋捐俸
重創書院願備
洒掃人幸勿揮門墻

太平宮

北風江上來吹瓦，隨屋角牛羊入廢觀。古木一鳥啄，問

此宅何神其來已渺邈。肇興自唐代，廟貌通樸斲。唐開元中

封廬山神為 上古神靈封，每視三公爵。東西南北中，嵩

岱恒華霍廬山雖僻左，不得列五岳。傲然踞江湖，氣象

頗卓犖。無端加秩祀，屈首受正朔。山靈恐未甘，孰與一

丘樂黃冠。那解此意在，崇禳桷昏昏。入醉夢，舉世呼不

覺。神來風綽旛，神去雲解駁。下視九萬空，紛紛蝸與鶯。

東林寺

連山袞袞來，陡起山門前。頑空被偪塞，失却東南天。石

稜瘦筋露，磴道枯縋懸。不知何峯水流作溪橋，泉入門

尋斷碑古蹟，想白蓮同時十八人。縛律如坐禪，飲酒不

入社淵明豈非仙

題遠公影堂後冰壺泉

影落空堂不記年依然冰雪照蒼顏
定嫌人世江湖濁莫放清流更出山

宗雷禪師索贈

荔枝塔古名僧少誰是堂中十九賢
好乞謝公池畔水爲師重長一枝蓮

題東林方丈

浮嵐疊翠偏崔嵬三面周遮一面開
我欲向西添小閣盡邀九十九峯來

株嶺一帶在寺西若置一閣名九十九峯亦絕勝也

三咲堂書阮亭先生題壁後先生題志云乙丑

新正四日同里阮亭王其奉

命祭告南海過

東林三咲堂觀故友東癡先生題詩為之憮然

詩載南海集中

聽雨軒中昨曾宿虎溪橋東今又過謝靈運屐去已久
蘇子瞻詩留不多兩袖攬雲獨惆悵一燈照壁猶吟哦
沙彌竊聽傳怪事大咲此客如風魔

西林寺贈魯宗上人

夕陽在西林孤塔支青天中有六朝寺鬪古不鬪妍樹
頭一朵雲渡水俄為烟老僧送客罷倚樹聽涼蟬

遺愛寺小憩

侍御遺踪已久蕪盤盤樵路極縈紆萬竿歲塢初迷寺

一笕分泉直到廚勝地乍來忘過客衰年漸欲信浮屠
木樨香裏逢僧話舊事三生記得無

香爐峯下尋香山草堂故址

古寺折而南一峯矗香爐北有草堂址荒榛穴黽黽白
公真天人咲傲凌中區本挾烟霞性歷遊仕宦塗當其
卜築時意已忘羈孤人生營菟裘寧必皆故廬等是有
興廢此中別賢愚

上化城

懸崖多烈風石縫樹不長怪此獨雄拔枝枝蔽穹蒼路
轉倍蕭森古陰暗虛廊鳥巢不敢寄一一皆下翔我亦
難久留毛孔森開張翻思風雨會快受六月涼

由關門石步行十里登大林峰

此來爲遊遨忽迫失足慮中情一恇怯進退兩失據墮
雲如奔逃片片掠回去霞標尚天半欲到苦難遽松根
絡崩巖怒石虎蹲踞隨身賴竹杖將伯倘予助移時陟
層巔鸞鶴似可御眼前少行輩坐長丈人偈登頓方自
茲休矜最高處

講經臺次昌黎遊青龍寺韻

城中望山如握管寸碧抽簪目光短罡風掣我絕頂來
地少雲多鋪滿滿一條江水拖細綫四面天形罩圓傘
鶴經枯樹或隔翎龍去空潭不貽卵何人結茆荒山顛
米罄齋廚爨長斷豈惟米罄水亦竭兼值今年連月旱

秋陽炙背汗透衣客到苦催供茗盃老禪對客大盟噉

指說茲遊太荒誕休誇筋力尚有餘應慮頽年行莫纂

陸機賦傷頽年之莫纂偶然饑渴所不免前路茫茫預難算資生

破寺例乞食此去深山漸無伴雨襟風帽好自擔垢脚

鬣顏向誰澣奔馳不定覺客忙應接無端累我懶白頭

住山年六十投老安心就閒散芒鞋不踏戶外塵坐看

嶽崎化平坦遠公歿後經臺廢世外名僧近尤罕談天

高論久寥寥一聽清言真欵欵此來得此吾有幸大似

冬寒變暄暖好竒歷險亦何爲語不在多微中窵浮情

一半爲芟除相別出門行步緩

推車嶺

奮身出絕險深入得平地玩情忘安危履險識難易憑
高試北望來路直如棄枯株盡僵仆樵採遠莫致野火
歲燒林虎狼何處避前山有厲禁僧律嚴於帥漸入翠
微天濛濛雜烟氣自此至天池皆禁山矣

大林寺岡上人茅齋

盤烟下層霄山骨微負土陰陰日光澹漠漠風氣古寶
樹壓橋低一溪環菜圃香山舊吟地花徑兼宿莽白樂天曾
於此四月看桃花其地猶名花徑廢寺亦荒涼半間用茅補孤清耐久
坐客至何必主林靜無匿聲虛簷應樵斧

洪武御碑歌

昇仙臺前白玉碑柱石擎攫龍之而鴻文載在御製集

初不假手詞臣爲我來摩娑一再讀顛者蹤跡大可疑
憶昔元人失其鹿群雄角逐爭驅馳濠州布衣人未識
芒碭雲氣常隨之金陵一朝定九鼎六合不足煩鞭笞
是時楚兵最剽悍不自量力來交綏國家將興有先兆
天遣來告貞元期明明天眼識王氣故以險怪驚愚蚩
英君往往謀略秘計大不許尋常窺亦如田單破燕騎
神道設教尊軍師不然茲事乃近誕小數何足誇權竒
白旄一麾江漢靖軍前長揖從此辭留侯自伴赤松去
穀城空立黃石祠天池之山高巍巍竹林仙馭杳莫追
鶴歸倘記石華表世代已逐滄桑移百年雨露在山澤
惟有松栢叅天枝

循佛手崖觀竹林寺石刻至訪仙亭

何年鑿渾沌洞戶啟虛牝瞰空飛瓏璽萬古疑不墮泉
蒸濕氣成一一結芝菌其西勢陡絕難以尋丈準天窄
忽倒垂地豁平野盡寸人不點目寸樹如束筭遠視入
毫芒俯身迫窮窘傍崖嵌樓閣側背削蒼隼青鸞十萬
隻掉尾掃欄楯竹林疑有無仙者蹟久泯短生寄長世
局踏良足憫如何不自廣蟠螭同螾蚓御風倘可行吾
意欲遠引

天池寺

西跨馬鞍脊東拊五老背廣袤四十里南北兩交會地
界畫雲霞岡形走杉檜架空營紺宇巨麗一山最佛皆

荷書卷之三
一
鑄金爲殿用鐵瓦蓋象筵及法供半出尚方賚琉璃百
盞燈光燭楚天外鳴鐘集萬指部牒領司會音膾當時曠
蕩恩池水亦霽霈神仙事渺茫崇飾母已太爾來漸凋
耗隙影過塊塏殘僧四五人被衲嬾結帶天池旱亦涸
磴道入蔚薈獨客來登臨嗒焉發深慨窮陰蓄邃谷瑟
瑟響秋籟

聖燈巖

見說文殊谷神燈照夜明山僧從未見高臥過三更

趙忠定公廢祠在天池塔傍

丞相塔前

塔爲韓侂胄所建故俗呼丞相塔

丞相祠千秋興廢偏同時

我來弔古一惆悵青史賢奸僧不知

赧封寺瞻赤脚塔

自從蛟拔門前樹水氣猶腥一派泉萬瓦盡隨飛雨去

孤鐘空向廢堂懸

三年前寺傍起蛟以百數殿瓦悉爲所掣惟存屋柱而已

泥金塔

縫風吹裂映竹窻櫺日射穿不用琳宮更魏煥御碑原

自配群仙

赤脚僧天池四仙之一也

下擲筆峰渡將軍河抵黃龍寺觀明慈聖太后
所賜紫衣經幢及元人十八羅漢畫像

危峰拔竒峭插漢秋崢嶸下走數千尺此身疑被阮溪
流寬且長潭影黝而清飛泉濺我領過山猶水聲漸入
漸無蹊蒼松與雲平萬枝皆直上曲木何由萌入林見
精藍御扁題有明勅建自神母豁達開朱甍一道護巖

碑蛟龍拱函經架裳垂頻婆錦繡揚旛旌新如手未觸
機上初織成元人留畫圖用意填丹青年深彩色退神
氣逾發生劫火焚天池赧封亦頽傾黃龍獨無恙故物
猶充盈得非深山中呵禁趨百靈勿輕現光怪恐使神
鬼驚

金竹坪

水緩山舒一徑分叢篁戛翠晚氤氳秋陰非雨亦非霧
嵐氣似烟還似雲偃蓋松低從蘚蝕藏經函古費香熏
內官死後茅菴廢好事僧稀失舊聞

明萬曆中有太監劉姓結茅於此今

菴廢
址存

太乙峰西麓有蘆林亦靜者之居也

誰將半幅江湖景移置千峰最上頭撥觸遊人動歸興
蘆花風裏屋如舟

自含鄱嶺下東行至蚱蜢嶺望大小漢陽諸峰

已近匡南道紆迴下嶺行路尋松鼠跡山占草蟲名曉
露沾衣重秋風信杖輕翠屏圍合處遙指仰天坪

在漢陽峰

上廬山最高處

入九疊谷循觀山麻姑崖經屏風疊上一綫天
會日暮不及觀三疊泉而返

信書不如無身歷解其故好奇輕坦道冒險犯迷路廬
山載圖經絕勝因瀑布三疊尤稱雄此來期勇赴尋源
既已得一壑經屢渡波濤所衝撞石滑不留步荒榛或

刺眼蛇虺時挂樹雲屏橫我前陰瀨風逾怒偕行率興
盡深入獨無怖漸上一綫天團團失四顧日光所不到
勃率但烟霧徘徊問樵夫道遠日已暮逡巡半塗廢老
懶坐自誤悞事豈可常一悔生百悟

晚至萬松坪二首

論谷量松不計株參天一片翠模糊明朝五老峰頭望
又作蒼雲貼地鋪

此中舊有高人住

謂聞極上人

遲我來尋五六年畢竟著書

須擇地人間難得好林泉

五老峰觀海綿歌

峭帆昔上鄱陽船我與五老曾周旋兩塵相隔骨不仙

蹉跎負約十四年近來稍知厭世纏筋力大不如從前
扶行須杖坐要筮絕境敢與人爭先山神手握造化權
走入南極分炎躔鞭羊欲從後者鞭假以半日登高緣
風清氣爽秋景妍芙蓉千丈開娟娟長江帶沙黃可憐
湖光淨洗顏色鮮背負碧落蓋地圓尺吳寸楚飛鳥邊
初看白縷生棲賢樹杪薄霄兜羅繇移時騰湧覆八埏
四傍六幕一氣連滔滔滾滾浩浩然渾沌何處分坤乾
近身扁石履一拳性命危寄不測淵陽烏毳撲光倏穿
饑蛟倒吸無留涎以山還山川自川五老依舊排蒼巔
來如幅巾裹華顛去如解衣袒兩肩酒星明明飛上天
人間那得留青蓮此時此景幻莫傳頃刻變滅隨雲烟

青蓮谷青蓮寺

饑鷹入山猛如虎掠過松梢攫飛鼠林深谷暗人更稀
橋斷溪橫道多阻忽逢大石刻三字快若同遊獲徒侶
前行依舊路茫茫太白書堂在何許三間破屋佛委地
一帶頽垣草沒礎獨來高咏廬山謠白日軒軒欲輕舉
屏風疊與五老對想像先生舊遊所石梁即是三疊泉
此景分明在詩語後來著書好穿鑿衆論紛爭吾不與

太白廬山謠有屏風九疊雲錦張銀河倒掛三石梁之句元李洞言三石梁在開先寺西黎崱言在五老峰上或云在簡寂觀及上霄紫霄二峰間棗喬廬山紀事則竟以爲無如竹林寺之幻境衆說紛然莫知所指今三疊泉在九疊屏之左水勢三折而下如銀河之掛石梁與太白詩句正相脗合非此外別有三石梁也後人必欲求其地以實古仙不作誰正之悵望秋雲久延竚之失之鑿矣

徧遊鈴岡嶺下諸禪室

山僧住山久不道深山好山下每相逢山中跡如掃
禪居既寂寂過客亦草草林荒鳥語斷葉落寒氣早
物外識閒情誰能耐枯槁

早發萬松坪

昨登五老峰足力鬪輕矯
紉投茆舍宿睡美不知曉
豈惟廢鐘魚林寂少棲鳥
起來見晨旭殘月猶雲表
山谷催早涼陰多晴恐少
迨茲好天氣我興殊未了

峒口下山

匡南古道誰開闢懸溜垂絲通
一脈劣容半足百八盤
直注雙眸五千尺靈區再上苦
不易步步別山多可惜

舉頭却望昨所經似到蓬萊今被謫

從萬壽寺經百花園

草烟竹靄午霏霏行盡懸崖接翠微過夏客餐嘗筍去
隔林僧擔賣茶歸襪花繞砌晴添艷乳水流田土漸肥
自覺向南風候暖早秋時節尚生衣

淨成精舍懷天然澹歸二禪師時二公俱下世
矣

萬枝修竹一龕燈山外青山又幾層有此林巒應著我
無多文物半依僧香前蠹辟繡經案鉢底龍眠挂壁藤
紫桂巖前人不見秋風猶記別南能

往與澹公別於家
黃門伯如圃中

三峽橋

陟山須到顛尋水須到源我從泉源來送汝歸山根上
流九十九併力同作喧前行經玉淵盡爲潭所吞既吞
不勝受含雪空中歎急峽跨飛橋約束遏其奔一條天
矯龍中有跌斷痕挾此萬古怒轟轟爭一門遊人不敢
立足底防瀾翻松風吹細雨到寺將黃昏

棲賢寺阻雨示角子禪師

七尖峰埋烟一塢五老神情皆下俯攜來杖頂昨日雲
洒作燈前夜來雨石頭路滑不可行遊人早起祈天晴
禪翁勸我且喫飯同向空堂坐水聲

雨後再至玉淵潭觀水勢

着屐重來又一竒飛流十丈躍龍池不知雨點添多少

跳沫粗於白鷺鷥

白鶴觀舊有唐道士劉混成手植杉東坡先生嘗獨遊聞碁聲於古松流水間即其處也

古觀荒荒冷翠交一渠新漲浸堂坳雨眠亂草移蟲窟
風折枯枝帶鶴巢旛影不飄經院靜棋聲久散石牀拋
三山路僻人稀到頭白黃冠自結茆

白鹿洞書院紀事四首

古洞盤旋路欲封到門無樹不喬松陰森前後三重殿
突兀西南五老峰兵火縱教仇典籍蟲魚何敢蝕蛟龍

書院中有

御賜十三經二十一史及御書二額

睢陽岳麓全荒棄留得宮墻

儼辟雍

書院舊名廬山國子監

九原可作心相許，千古淵源只數公。大事商量何草草，當時位置太匆匆。祠荒勿復論分合，道在終須辨異同。祀典也應煩早定，莫令禮樂咲淹中。

前賢餘澤最分明，立法雖良視奉行。幸爾流風綿歷代，猶從朔望集諸生。學田籍去官支俸，觀德亭荒士好名。此日終南非捷徑，溪山何負讀書聲。

松顛紅鶴早歸來，卓爾山前半草萊。題扁已更新歲月，看碑猶辨舊亭臺。無端講院人人設，何怪儒風日日頹。傳語後來須慎重，此間容易著英才。

萬曆己卯張江陵
禁革書院先是常

有紅鶴百十巢於後山松杪其年
忽去越三年仍來巢書院隨議復

鹿眠場

山人陳迹久荒唐石洞新移近講堂町疇年年秋草沒

兒童偏指鹿眠場白鹿石洞明南康守王溱壘石為之在巽倫堂後非故處也

左翼山武侯祠

舊來忠節祠何處丞相新堂獨改營洞中舊有忠節祠合祀武侯靖節今

祠廢靖節神位移入朱子門人之列若是此中多序爵故應無地置淵明

循貫道溪南北觀朱文公題志諸石刻

我留鹿洞訪古蹟夜以繼日勤搜羅穹碑無數作林立

大半劖刻時人多蛇蟠蚓結互相雜頭目眩瞀猶摩挲

先生姓字如日月照耀宇宙開山河生平衣履皆可敬

矧乃手澤存巖阿溪邊巨石見題字小者徑尺大擘窠

自然運用合古法小技不算隸與科水淘土觸殺節角

元氣尚自盤蛟鼉誰能撫取置殿壁紉辨點畫無差訛
嗚呼所見母乃小金石非壽道不磨

次韻答白鹿洞生周宸臣並簡學博鄭子充副

講徐履青

吾生苦失學悔往思補來一經未精通賦命多遭迴
顏扣名區洞戶呀然開登堂挾浮氣靜者恐見猜此來
爲求友庶幾遇竒才之子杜門處堦前長蒼苔昔年充
國賓群彥多追陪脫身出京洛振步凌崔嵬爲儒務其
醇好勇知所裁士方處貧賤有識羞良媒詞章技尤卑
小草殊根莖讀書不聞道枯朽安足摧古來名師儒所
以重草萊

出白鹿洞經羅漢嶺下至王楊坂

蒼蒼轉一溪，窅窅凡幾曲。烟中見村落，雞犬傍草屋。阡陌交橫，從秔稻雨早熟。謂言岡路盡，豁眼得平陸。涉澗水急流，吾行尚山麓。循流溯此水，來自棲賢谷。想當暴漲時，發石拔老木。兩傍設機碓，日可轉百斛。此法俗不傳，勞勞手春粟。

萬杉寺贈熙怡長老

慶雲峰麓萬杉寺，拓地舊傳天聖中。大書鑿石剩九字，

寺中石刻甚多，悉爲僧所踣。今惟槐京包帚書龍虎嵐慶九字在寺後石上。

古殿跨山連百

弓，夕陽沈沈南去鳥。秋氣颼颼西來風，相逢不談戶外

事。吾愛老僧雙耳聾。

開先寺

平橋曲礧氣森森門鎖空堂晝轉深

時居僧以斫伐佛印手植松為當事

所逐三門晝開

小吏司鎖鑰 鴨脚葉黃僧罷掃麝囊花紫客來尋

寺創

於南唐時山中有麝囊花色正紫中宗嘗植于移風殿名曰紫蓬萊

諸峰瀉瀑層層見萬

木聞蟬步步陰可惜不容吾借榻山南第一好禪林

李中主讀書臺

鶴鳴峰勢倚巒岉指點南唐舊石壇畫像影中松葉換

黃山谷開先禪院記有南唐中主畫像及榻存焉

墨池涸後蘚花乾累朝題志

名空在眾口傳訛辨最難

俗傳略明太子書堂者訛

珍重涪翁留片

碣雨淋日炙恐摧殘

石上刻山谷所書七佛偈

王文成紀功碑

明朝制科號得士吾鄉前輩尤絕倫于公王公後先出
往往艱大投其身朝廷坐收養士報倉卒定變皆儒臣
正德己卯夏六月逆濠犯順江湖濱公然舉兵思向闕
三郡一閱生祗塵皖口駸駸勢將下留都岌岌恐震隣
是時海宇正清晏武備缺略久不振公方持節撫南贛
似可觀變徐邗迤同仇大義憤所切守土敢限越與秦
出師必待九重詔是謂以賊遺君親飛書插羽聲罪討
攻所不備真如神自從擣巢及執醜通計時日纔兼旬
軍門戎首已面縛天子鞅韜方南巡石頭城南獻馘罷
待命行及明年春周公東征尚躋蹙形跡詎可拘忠純
盈庭宵小古亦有忌者愈衆節愈伸初心祇期濟國事

豈必畫像圖麒麟茲山勒銘蓋有故深刻歲月題庚辰
紀功非夸乃紀實書法道勁辭溫醇首從伐叛叙始末
繼舉神武歸丹宸天方嘉靖我邦國誰其紀者臣守仁
隨征官屬例得列惜哉名姓今俱湮讀書臺傍一片石
百四十字磨崖新逸事吾聞長老說弘治乙榜凡三人
後來立朝適共事數本前定非無因胡發其奸孫殉難
公乃一手回千鈞弘治五年吾浙鄉榜公與胡公世寧
孫公燧同舉其年場中見三巨人傳
爲異事及宸濠之變胡首發其奸孫
以巡撫死難三人共此事亦一奇也煌煌勲業本德性
出遇世會開經綸質諸百世可無惑似此理學寧非真
後來輕薄好詆毀撼樹不過欺愚民如公表見猶未免
此外何以加冠巾手磨碑碣發長嘯白日皎皎懸秋旻

敬業堂詩集卷十五
五
題聰明泉傍石上

頑童漱清甘我見謂可惜我旋被彼咲浣手向澄碧人
苦不自量無端分別多飲牛與洗耳相去能幾何

玉峽亭觀瀑

女媧煉石手年久漏微罅銀河忽垂天峰頂劈二華陰
寒透毛髮觀者初可怕從來所踞高一跌必就下龍歸
爭窟宅思以一戰霸雷霆震嚴冬冰雹凜炎夏衝成井
萬丈避去石三舍束身峭壁傍俯視若出跨相持勢難
合掉尾竟傾瀉來者競喧囂逝者已代謝風林延靜聽
漸遠似分汜縹縹絲車鳴泱泱糟床醉盡平震蕩心坐
以觀物化

萬竹亭

孤亭避玉峽一徑幽篁裏鑿斷籜龍根石槽方吐水

五乳峰下望黃巖瀑布

五峰融乳氣流濕一穴洩雲聲滿空落日正懸高樹杪
行人却在雨絲中

歸宗寺次頴濱先生舊韻

遙瞻孤塔近聞鐘又到金輪第一峰五老烟霞猶在眼
六朝風景獨留松寺爲王右軍捨宅鵝池細合簾泉派鸞水涼
分茗盃供歷徧名藍茲最古夕陽簾閣影重重

登右軍閣

右軍高閣俯碧渠古木漾影交扶疎迴廊灣滾得幽趣

高有飛鳥潛有魚此間臨池頗自可我腕有鬼不善書
作詩亦欲題壁去擲筆一笑成墨豬

鸞溪

二老風流路未迷青松名與白蓮齊若將山水平情較
似覺鸞溪勝虎溪

元豐中周濂溪先生與真淨文禪師於此結青松社人以此比虎溪云

寄題簡寂觀十四松

梁時碑記

梁沈璇有簡寂觀記

晉時松十四株如十四龍約汝重

來吾不負好留鱗甲待吟筇

從栗里渡柴桑橋至鹿子坂訪醉石觀靖節祠

陶公家柴桑地本接栗里高賢樓隱處土物覺清美風
翻紫芋苗雨綻紅蓮米平坡樹簇簇枉渚波瀾瀾徘徊

山東南何處訪故址逢人輒問姓覬遇陶氏子但見巾
角翁叱牛入烟裏先生在當日逃祿如脫屣至今山下
柳尚識折腰恥肯令後世名人人得輕指聞風感頑懦
即此可以起

圓通方丈與梁菴長老夜話

到門山壓樹冒石水衝橋古殿防頽塌閒房取寂寥齋
鐘秋後準燈盞夜深挑尋遍峰峰寺高僧不在遙

月下步入隣菴同杲公

尋山翻苦忙忽忽度長日徘徊撫良夜清景殊未畢隣
僧閉門早避月不肯出客來扣柴門帶月入爾室空堂
琉璃暗古佛黑如漆不有好事人清光爲誰溢

尋夜話亭一翁二季亭故址皆不得戲示杲公
十里無端枉道來歐蘇陳蹟委蒿萊人間好事誰如我
博得圓通一宿廻

渡石澗橋欲遊石門精舍不果

客從山中來嵐氣濕巾帽北尋黃龍潭南送白水漕

五老

峰下澗名
讀作去聲

石門路非遠一澗流浩浩翻以耳目前行踪

未經踏吾將賈餘勇直入窮闔與謀及道旁人競以險
惡告或云林黯黹或云石篤鰲或云夔罔兩遇者恣凌
暴或云採樵叟壯年曾一到白頭每追悔相戒勿再造
或云天池僧亦曾宅崖隩荒寒難久住苦舍隨歆倒爾
來更誰繼奇險敢輕冒老夫爲踟躕獨聽奪群譟廻思

謝康樂鑿山每開道當時築精舍物力豈空耗不得從
之遊悵然道及好

廬山雜咏四首

食豆兼食苗豆苗瘦如縷不聞豆花香惟帶豆葉苦豆葉

老鴉銜茶子隨石久成樹何必百花園峰峰有雲霧林

茶亦名雲霧茶

誰遣冒松名而長三寸許山頭有蓬藿俯視猶傲汝萬年

松

山花合在山幽谷尋難見却笑紫蓬萊愛入移風殿麝

花

遊山歸錢越秀呂灌園出示見送詩戲答二首
一卷新詩吟不盡歸來只與未遊同野人胸次無宿物
好景仍在廬山中

千古才難洵不疑敢將輕薄入文辭眼空除是東坡老
咲得徐凝瀑布詩

自題廬山紀遊集後

半生讀書不得力浪走風塵嗟暮色名山五岳杳無期
此日匡廬面初識千秋物象遞顯晦幾輩閒人肯登陟
謫仙頭白倘歸來白石清泉聞太息獨移瘦杖扣石鏡
雙眼快對晴空拭已知絕境少豺狼那怕荒蹊犯荆棘
鴉飛不到力有限龍起無時神莫測橋邊聽暴雨淙淙

峰頂看雲松叟叟三秋忽變候寒暑半月畧盡山南北
偶然興至或留題聊藉微吟豁胸臆詩成直述目所覩
老矣焉能事文飾仙靈幽秘苦雕劂雲霧蒼茫每深匿
忽逢生客一呈露可惜無才收不得歸途鹵莽方自嗤
遊况匆忙誰見逼人間涉歷多梗滯祇此一途猶未塞
皇天亦似憫汝窮恣爾窮探無吝嗇如何汲汲向城市
若赴嚴程拘漏刻他年終伴采芝翁臨別有言吾敢食

敬業堂詩集卷十五

敬業堂詩集卷十六

海寧 查慎行 悔餘

客船集

起壬申九月
盡十二月

樂天琵琶行自述遷謫之情託于送客而不著其
姓字未必果有其人也今余與恒齋別正值楓葉
蘆花之候恒齋官况不異左遷別後倘有詩見及
其母使人疑此客為烏有子虛乎

留別恒齋太守次見送原韻

小住衙齋忽半年河梁只在一尊前重携風雨登山屐
又上江湖載酒船有此別離成我老無多才調感君憐
蘆花楓葉殘秋路不聽琵琶亦黯然

鎖江樓下再與恒齋別

聚散真無奈行期已數更不緣歸路遠翻遣別愁生
潮到潯陽縮江過皖口平戍樓今夜月相送比君情

早發湖口縣

山色滿空城蒼烟帶曉晴舟人辨風信關吏候鷄鳴
湖勢三秋減江流九月清半年經六度此度是歸程

初秋與恒齋住舟彭澤余有七月初三日五律
一章重經此地屈指六十日矣聚散之感愴然
入懷再作一詩附九江後信

小縣江天豁西南月吐鈎轉頭如昨日撫景忽殘秋
路改攀曾岸燈明隔浦舟烟波三宿夢猶自戀江州

舟過大雷岸二首

雲收霧散來時路，竒險初欣過馬當。
風日晴和秋澹蕩，江山平遠樹微茫。
畫圖側畔移帆影，明鏡中間耀眼光。
合與詩家添好句，不然辜負薄遊裝。

荒洲夾岸沉漁蕪，小市臨流颺酒旗。
去舫校多來舫少，遠山不動近山移。
鷗憐故侶行音杭相傍，雁折斜風字亦
竒。一事歸人獨惆悵，匡廬西望已迷離。

夜抵黃石磯

過盡魚罾蟹斲邊，依稀村落在山前。
半江烟霧半江月，一隻夜深歸客船。

搭魚詩

有序

沿江捕魚者碇小船急流中截竹二尺許緝而不鈎
繫豕肉作餌兩人對把一竿隨放隨收鰱魚長二三
寸者應手而出稍緩則吞餌逝矣日可得數十斤名
曰搭魚曝乾加紅麴為鮓鬻於寧國山中

昔讀魚具詩纖悉苦難曉今來江湖畔意外駭機巧竹
竿二尺長芳餌繫其杪曲鈎渾不用緝直影隨表滅滅
水聲中鱗鱗出白小有如拾蚌蛤一一向盆沼十不失
二三得心手馴擾自從罔罟設水族久莫保此法古未
傳吁嗟更誰造庖廚窮口腹物命例短天有情為惻然
放筋吾忍飽

早過大通驛

夙霧纔醒後朝陽未吐間翠烟遙辨市紅樹忽移灣風
軟一江水雲輕九子山畫家濃淡意斟酌在荆關

重登銅陵太白樓

千古竒才一謫仙當時寂寞後人傳誰憐我是題詩客

淪落江湖十四年

已未夏余曾題
詩樓上今尚存

天門山

北望采石磯南望蕪湖關蒼茫裕溪口豁達天門山長
江萬里來近海勢逾寬到此一約束帖然成安瀾秋空
掃濃綠兩道蛾眉彎亦名蛾眉山弦月帶衆星盡歸吞吐間
亂帆不自整散落鷗鳧灘浮雲本無程日暮相與還我
行何處泊前路方漫漫

采石舟次喜遇介菴叔即送其游楚

半載家書斷逢君喜欲狂
細微談近事安慰當還鄉
別夢吳船隔征途楚水長
忍辜今夜酒明日况重陽

九日三山舟中有懷德尹近得家信聞弟已渡

淮

夾岸蘆花作絮飛
鯉魚風急客添衣
從來節物悲遊子
如此江山送落暉
鄉路尚成千里隔
別時原約半年歸
誰能料得貧家事
去住無端與願違

重泊秦淮二首

袁家鵝鴨薛家羊
不問當墟賣酒孃
懊惱一秋無菊看
楚人船上過重陽

市樓南北酒帘青市上游人半醉醒何暇管他亡國事
更將閒泪洒新亭

金陵早發

東方大星射芒刺一片江光白如地去城未遠尚聞鐘
烟柳濛濛六朝寺

登燕子磯

迴欄步步轉雲汀若要登高更有亭淮岸柳條秋尚綠
孝陵松氣遠尤青城啣日出排鴉陣天偏江低響雁翎
添得重來多少恨西風吹帽鬢星星

憶與韜荒兄泊舟
觀劇屈指十三年矣

同譚護城給諫飲朱十兄竹垞齋席上分賦

檣燈塔火照城闈僦屋依然近作鄰九陌並回三載夢

一官難救五湖貧，飽經世故初心在。畢竟交情老輩真，
慚媿為歡煩。二主買魚配酒餉歸人。

題鄭春薦廬墓圖

舊來宰木已參天，書帶重生丙舍前。多少康成門下士，
一時俱廢蓼莪篇。

題朱北山西溪梅花圖卷

一篙寒水平，盃綠松木場。西凡幾曲春頭臘，尾萬梢梅
照影橫斜散。冰玉花時一一為我，有別業西溪曾卜築。
廿年不到漸疎蕪，借與隣僧挂瓢宿。一番大雪凍連月，
聞道摧殘到松竹。可憐老幹剩槎枒，有似佳人在空谷。
對君此畫增健羨，蟠螭龍蛇歸尺幅。欣然意到不留手。

偶爾圖成聊寓目春烟欲動氣葱葱夜月斜穿光燭燭
略施朱粉紅間白力挽冰霜骨勝肉恍如幽夢向溪山
洗盡胸中筆端俗我今倦遊百事廢一壑能專良易足
相將同賦歸去來花氣浮餅酒應熟

再題霜林秋晚圖卷

長風入林瘦蛟舞萬葉低昂爭仰俯劈開玉峽飲晴虹
倒射霜空撒紅雨中間幾株尤耐霜濃者得綠淡得黃
與酣渲染出真意絹素絢爛凝秋光瀟湘洞庭多變態
放筆知君與神會披圖莫作咫尺觀別有蒼茫在圖外

王令詒過村居小飲限韻各賦二首

十年出求友時輩方縱橫與君非苟交結托重老成所

以我諸弟事君亦如兄每聞君造廬一一皆歡迎且須
惜此意勿作匆匆行

湓城得家書送爾倍惆悵

初秋與令詒別於九江

吾舟未東下吾

弟方北嚮同時忽同歸

余到家半月德尹亦歸

事固未易量喜君

復見過此會出非望所嗟不盡歡隣喪春不相

荆州兄方丁太

夫人艱故云

無計獨留君燈前北風漲

題陳言揚抱膝圖二首

使君與僕孰英雄寄托如何不約同此意沈吟應共惜
半生光景畫圖中

與君識面從兒穉不覺形容漸失真同是庚寅吾獨老

始憐衣上十年塵

余與言揚皆庚寅生

再題言揚看舞圖

舞袖雖長不自持，歌喉縱好有誰知。
賞心或在人情外，看取停歌罷舞時。

維揚談禘初亡兄，韜荒壻也今來就婚投。
詩見贈感賦一首。

吾嫂持門戶，吾兄肉已寒。
夢為雲聚散，愁見月團圓。
得婿如君少，為甥似舅難。
十年存歿淚，相對不禁彈。

廉讓寄南燭子詩索和戲作一首

曹家二尺紅珊瑚，霞光照耀開座隅。
季倫如意不敢擊，變作顆顆勻圓珠。
冰霜太寒雪太白，可少丹砂點顏色。
綠毛么鳳愛梳翎，尾重身輕飛不得。

斷硯歌寄和姜西溟

姜侯才高同屈宋往往彈冠讓王貢舉場老負十上名
史館貧支廿年俸硯田一片羞自給略似良農勤執種
為言此石初得時愛與端瓊稱伯仲

端瓊亦西溟藏硯

每因拂

拭誇朋友未許收藏付僕從平生不以文滑稽滴露研
硃事修綜窮經恥勿草太玄給札雄堪賦雲夢不知磨
耗幾挺墨書到成家筆方縱可憐尤物難久完識者何
希忌何衆秦城十五不輕易博浪一椎翻誤中有情那
免號癡絕足削荆和抱深痛唾壺口缺琴尾焦咲此依
然配清供作詩聊用解客嘲屬和無端邀我共我今所
見與君異嗜好心空色不動膠聯漆附終有痕

來詩有膠聯漆

附太堅豈比天生本無縫勸君撥棄勿復道瓦礫寧當

綴之句較輕重君苗焚硯古有諸持此區區欲安用

並轡集

起癸酉正月盡三月

余以新正東裝北上德尹初未有出門之約二月
杪忽相遇于淮上遂偕翁康飴嚴定隅並轡而北
通計一春所作無過三十餘章皆行役之詩也故
彙成一編

春夜飲曾濟蒼宅同徐淮江

春波門外如鈎月六里長街未上燈花徑初除三尺雪
雅人相對一壺冰窮愁老境尤貪酒樂事新年在得朋
從此兩湖添地主

余向寄徐淮江詩有兩湖地主惟君在之句

每逢高會約

徐陵

貽笏圖為徐淮江賦次李武曾韻

徐家手版傳忠襄曾隨封事携皂囊牙花欲開天變候
 雷兩白日撽谿堂堂中書籤三萬軸一一玳瑁琉璃裝
 牀頭置笏床下拜髻髟排擊舍風霜自從尚書殉社稷
 對命無復王廷揚問君寶此竟安用謂是祖德貽縹緗
 君家祖德非尋常日星皎皎懸孤光百年朝典存手澤
 世閱兩代源流長公侯子孫必復舊爪爬綿邈今方將
 鳳雛已得韓冬郎七歲弄筆吟繞廊丈夫生兒有如此
用少陵徐卿
二子歌中句對客那得能深藏塗鴉畫虎無不可但是
 驥性終馴良乃翁與世不同調挾筴莫歎亡羊臧摩挲

老眼待他日為汝持笏還端詳

吳門程汝諧乞詩為節母孫太君壽

古人乞言重名義今人乞言重勢位數篇排比達官名
滿幅雷同錦屏字程生壽母乞我詩我名微賤世莫知
感生厚意惜不得但媿窮老無妍辭區區持贈一言耳
非此母不生此子我為此語豈無徵試問南湖老居士

汝諧出老友盛鶴江
之門故落句及之

再題東湖弄珠樓壁

滿湖新漲綠如油五度凭欄記此樓粉壁有詩僧代掃
青衫無趣客重遊花邊舊事閒相觸醉裏風情老漸休
多謝柳條長短意尚含烟雨拂孤舟

荷葉詩集卷一
八
鄧尉山看梅與譚護城都諫分韻

買帆下吳閭晨夕風雨對掀篷喜開霽決起逐儕輩明
波洗雙眸遙見峰染黛橋低榜稍進竹密步微礙紆徐
入兮墓梅信行已逮古榦無醜枝疎花有餘態寧知山
近遠漸覺路茫昧濃日散晨光千林同一槩蒸蒸氣浮
動靄靄香奔潰人聲絲竹聲多在白雲內居僧揖冠裳
游女曳環佩青紅小姪姘紛若魚同隊見花嬌不憐手
折髻邊戴本為冷澹遊喧沓性叵耐翻身暫引避穿徑
出荒穢前登馬家山高出萬花背境荒人罕到鑿石初
破塊自然愜幽趣真景非粉績僕本住山人無端走關
塞故園三百樹先植記好在有花不得看既出每深悔

此來復何幸夙願償意外神交契新賞老戀割私愛俗
腸旣蠲除塵面一盥頰逝將營半畝斲地把耒耜君如
娛晚計共買花邊埭歸田事不難所要在勇退惜哉迫
行役各與初心偕解纜復踟躕清遊幾時再

過葉已畦二葉草堂出新刻見示

疊成山勢鑿成窪位置柴門趨屋斜小築人皆稱得地
遠來吾不爲看花舊遊歷歷經心眼餘論津津溢齒牙
未敢對君談著述十年衣袖有塵沙

吳門勞在茲爲余作畫冊

自題佳句寫雲烟不獨詩仙畫亦仙筆墨我緣人品重
聲名天許布衣傳家留林壑藏書屋

君爲洞庭
西山人

春在江

湖采藥船老覺塵埃真少味相逢猶話住山年

常熟過錢玉友河亭時玉友亦將入都

薜荔交陰覆短墻詩人居近苾芻房俄驚小別成三歲
直訝相逢在故鄉兒摘畦蔬供午饌婦藏斗酒佐春觴
祇愁旋被饑驅出未必家餘住夏糧

大石山房西城樓閣為虞山絕勝處

又作西城半日留短筇筋力試山遊愛隨雲氣穿仙掌
笑插花枝上佛頭三面城根三面水一層樹杪一層樓
人情那得能知足好景多貪極自收

留守瞿相國春暉園

不知頽廢自何年一片傷心到目前戰後河山非故國

記中花石尚平泉烟埋平碧迷芳草血染春紅化杜鵑
狼籍南雲憑檻外愁看白日下虞淵

拂水山莊三首

名園未到已神傷指點雲山入渺茫老屋尚支秋水閣
墓田新拆耦耕堂藤陰漠漠餘花紫梧徑離離夕照黃
猶有游人來買醉兩湖烟月屬隣莊

滄桑殘局等閒分野史亭邊日易曛異代文章歸紀述
盛時裙屐屬傳聞畫圖夢蝶尋紅豆書劫焚魚感絳雲
留取舊栽花木在罷官還說李司勳

松圓爲友河東婦集裏多編唱和詩生不並時憐我晚
死無他恨惜公遲崢嶸恠石苔封洞曲折虛廊水瀉池

惆悵柳圍今合抱攀條人去幾何時

瓜洲大觀樓張見陽郡丞屬題

柳梢城角影毵毵烟放桃紅水放藍到此忽驚身是客
捲簾江北望江南

秦郵舟中紀事

截斷湖光別作隄一條荒影亘虹蜺居民飽食黃河鯉
客飯愁添濁水泥不解天心何日轉若論地勢向來低
誰憐禹貢揚州域急挽東流更向西

魚溝看桃

一村桃開一村柳日氣射花紅撲鞍此事今年真過分
江南江北兩回看

與德尹同坐騾車戲作二絕句索翁康貽嚴定

隅和

淮浦相逢事太奇小船同載蹇同騎與君便是同功蘭
不許人間有路岐

抵足朝朝作臥遊欠伸一笑兩擡頭擊殘車壁殊多事
鼠穴前頭夢八騾

德尹詩有一龕恢恢之句用其意再作一首

別茅菴出已多年又結津梁道路緣添個蒲團相對坐
也如行脚也叅禪

從峒嵒騎騾至紅花埠

峒嵒小驛勃姑啼路入徐州漸向西若要看花須趁早

防他一雨便成泥

雨阻紅花埠一日

衝風衝雨衝波浪瞥眼江湖十載餘肯信壯心銷便盡
一鞭泥滑怕騎驢

望蒙山同定隅德尹作

疊翠浮嵐不記重群山絡繹走蒼龍若論舉眼人人識
只有知名一兩峰

道傍見蠅虻轉丸

不知何意轉成圓糞壤生涯大可憐翻似向人誇絕技
一丸突過馬蹄前

望岱

一朶雲扶一朶蓮
蓮花頂上即青天
可能膚寸為霖雨
今是乾封第幾年

至河間聞彭椒喆量移之信留詩寄之

八載循良吏初遷
本分官敢云從政
易轉覺致身難
客路雖相左離愁
此暫寬一春傳旅
食今日為加餐

次新城先生壁間韻

餅鑪酒店兩三間
塵壁題名記往還
留得和詩人小住
綠楊簷角鳥關關

曉過趙北口

十里風埃過鄭州
忽開雙眼見清流
綠楊影裏平橋路
數盡漁船數白鷗

題王赤杼籬豆畫卷二首

豆葉翻翻豆莢肥
檐前蔌蔌草蟲飛
故園秋意忽到眼
一陣野風吹客衣

沿籬手種兩三莖
引蔓垂梢漸滿棚
生被畫家榆樣去
帶花拗折一枝藤

送趙子晦之任延津二首

青袍謁選十三年
此去雙鳧便是仙
滿眼簿書非俗物
太行山在印牀前

車笠相逢兩不猜
湖湘分手又燕臺
參軍一老今頭白

重與郎君贊畫來

謂彭南陔

次韻酬唐實君喜余入都之作

吹得楊花作雪飛帝城春事已全非
桐經爨後孤絃絕
鐵化魚來尺素稀東閣何期今再到
故人長恐見無幾

詩楚茨疏
幾期也

白頭賸爾如新在
縞帶猶堪博紵衣

附原作

唐孫華

客散梁園隊雨飛尺書驚見是耶非
鄰房燈火鳴雞
杳岐路雲山候雁稀
飲酒人非攻子美改名君且學
劉幾長須扣戶吾遙識蚤晚將迎辦倒衣

初夏同叔毅定隅霜巖德尹坐一莖菴後香林
亭

一窖黃塵沒馬蹄喜從塵外得招提出
墻僧梵風吹斷
拂面花枝鳥壓低
溝水欲流亭影去夕陽忽到柳陰西

浮萍落絮同飄散閒繞空廊覓舊題

已巳秋與竹垞水村雨遊此

淶水亭與唐實君話舊

鏡裏清光落檻前水風涼偏鷺鷥肩菰蒲放鴨空灘雨
楊柳騎牛隔浦烟雙眼乍開疑入畫一尊相屬話歸田
江湖詞客今星散冷落池亭近十年

偶閱揚次也賣花詩戲次原韻五首

先從槐樹斜街過旋到慈仁寺裏來淺綠深紅春四季
跨驢騎馬月三回

分明已過早春時駘蕩風光不自持大抵人情誇爛熳
斷無人賞未開枝

帶來春色三分土吹過風頭一闕塵莫認園丁作園主

種花人是賣花人

白白朱朱漫作堆
舊家亭館記曾栽
閱人最有花兒匠
及見園空長綠苔

草本經年易長成
豐臺美種一時并
當初芍藥原名貴
莫以花多便見輕

次韻答實君

被褐時方輕垂紱
古有戒匪材等樗櫟
不熟讓稊稗感
君勿我棄假館同
瀟灑城隅積水潭
浩汗滙衆派禾苗
綠油油牕戶明
噲噲棄之為馬腕
放眼靡所屆庶幾
東閣中得士稱一
快吁嗟及時事念
惰疑近隘各隨出
處緣並守廉隅界
短檠光煜煜缺月
東南挂對床連夜
語

里耳竊聽恠非無蛙聒噪亦有鼠黠獐集泮本好音飛
鶚吾豈解孤生分衰賤舊業棄土崩腰非長揖具况肯
望塵拜誰能將肺肝穡怒供裂眦釣釣聽曲直碁局付
成敗似聞逐客議張觸動機械時臺中有條議國學生
田本籍鄉試者世
或指鷹鷂吾其避蜂蠆國家有大計草野腕徒搯言官
例毛舉通病詎能嗟公卿非不知相視各噤齟可憐文
廟栢祇用便馬疥騷除由廡下梁木孰支壞議難決一
朝吞吐苦不噉將母國體傷識者為深喟君詩雖有激
風義實誥誠布衣何足云道路未償債炎埃蔽赤日六
月迫行邁山田歸及耕書籍行當賣勞筋應自息倦羽
非人鍛得喪心已空須彌堪納芥

附原作

唐孫華

名士今幾人世方以爲戒良玉溷武夫嘉禾雜粃稗
君才固卓爾盛製富揮洒崇山俯培塿溟渤吞衆派
魯邦久卑邾淮陰豈伍噲長安踏槐花賓興期已屆
如君得數人制科誠一快吏議聞逐客斯舉亦已隘
如何辟雍中輒畫鴻溝界網羅失長鯨敝笱愁空挂
厲階誠有由壞事因鬼怪昔者夸毗子紛紛逞狡獪
伸喙餘三尺臨文無半解惡草等葦菴微材僅菅蒯
豈有鄉里交但下傖荒拜大德忘丘山小怨結睚眦
射羿弓旋彎會涇盟屢敗對譚語設弈默坐心藏械
螫手類蝮蛇嚼肌甚蜂蠆奪利腦競鹽爭門臂各搯

猥險成世風積疾何由瘥所以當塗人疾視久噤齟
驅使歸井閭淨若除癰疥高墉惡雀穿長堤綠螳壞
世遂嗤空名畫餅不足嘜因噎遂廢餐此事可一喟
君性本冲和三緘夙自誠流落坐詩窮羈棲負酒債
遇合會有時慎勿嗟行邁錦段久織成何處不可賣
虎氣有時騰鸞翮無長鍛一名轉瞬成行看拾地芥

題陳履仁登車圖小影

手拂雙花五鬣雲世家文采孰如君八騶四望尋常事
只要來空薊北群

題顧書宣畫冊竹筩水仙二種

南去嘗雞嶼北來食松繖指與紅竹菇畫中添土產

雞嶼

產滇南松織產勞山
宜興山中有紅竹菇

老根如蒜頭大葉如蒜苗欲抽一寸心待此冰雪消

敬業堂詩集卷十六

敬業堂詩集卷十七

海寧 查慎行 悔餘

冗寄集

起癸酉四月
盡十二月

不到自怡園三年矣相國明公聞余至都復下榻
見招時唐實君亦以謁選北來樂數晨夕未幾實
君因人遠遊余旋應秋賦倖舉京兆遂爾滯留自
夏歷冬大約園居之日多城居之日少東坡詩語
似為余設也

次韻答愷功二首

移牀來對好溪山只作漁樵共往還癖愛文人知業慧
未拋卷帙趁官閒雲垂高幕藤花紫雨放新梢笋籜斑

若向此中微領會詩情原在寂寥間

樹底泉聲竹外山清暉娛客竟忘還魚無羨意鈎宜直
碁少爭心局自閒春去蘋洲風澹澹雨來花徑土斑斑
畫圖光景分明記又掃攤書屋半間

時將移寓
自怡園

對雨戲效白樂天體四首

兩岸沙沈樹千帆浪拍天長風吹不斷獨鳥去無邊白
酒標旗濕紅鱗出網鮮此時如對雨最好是江船

忽聽笙歌起烟波何處尋四圍山漸澹一角日初沈捲
幔通荷氣停撓隔柳陰此時如對雨最好是湖心

一片秧針綠村村罷踏車黃梅多放鴨

鄉人以芒種買
新鴨名黃梅鴨

翠剡盡鳴蛙種水牽菱蔓開門落棟花此時如對雨最

好是農家

竹色涼窗戶泉聲落珮環不知青嶂合長在白雲間
籜籠分茶早機衫挂壁閒此時如對雨最好是深山

唐實君作憎蠅詩可補歐陽賦所未備僕不復
鬪竒戲廣其意得五十韻

吾觀大化內鼓物同洪鑪介羽及昆蟲種類何各殊
摻羅到瑣碎終非磊落儒聊為更僕數庶用資挪揄飛者
為蜻蜒穴者為螻蛄在戶為蠪蛸在簷為蜘蛛微明耿
熠燿背殼潛虻蚰薄翅扇蛺蝶細腰祝蒲盧螻或鳴於
泥蚓或歌於塗絡緯織作巧糞蜣轉丸愚螳螂怒當輪
蟋蟀勇負蝟堆積走負板腥羶集元駒與人了無害聽

彼繁有徒蠖蝮險如蟻玄蜂大如壺鉤卷音蠖刃利針
聚蚊雷轟刺蚝有瘁肌蠱尾有嗜膚昏昏蝨在禪趯趯
蚤躍襦偏人雖咄咄懷毒終區區惟蠅獨可憎其來胡
為乎汝於耳目前本不關有無汝狀極醜惡偏傀粧頭
顛赤幘同一冠青蒼別形兩翼六其足公然學讒夫
汝生本臭穢行與糞壤俱只合老廁園何當闖瓊瑜無
端附驥尾馳騁遊莊衢無端入綃素點染損畫圖有時
集於爪學士群睢盱有時止於棘詩人互嗟吁聲非雞
則鳴例與狗苟呼此特論大概未足蔽厥辜客從長途
來翻漿汗流珠解衣覲少憇喘息猶未蘇汝何太相偏
伺隙窺門樞我眠晨未起汝偏攪牀敷我起頭未櫛汝

又環座隅我饑進盤餐汝貪善為狙我閒弄筆硯汝飽
成墨猪汝腴我合瘦汝衆我則孤我欲廢飲食汝方混
庖廚汝于我何尤抵死相迫驅營營惑人聽有若操契
符貝錦抱萋斐不祥等狐烏懷中三寸璧點污生瑕瑜
架上一卷書棄擲消樗蒲凡此皆汝罪誅之不勝誅逝
將避汝去行行復踟躕我力故難勝汝情諒應輸天下
正一家能毋懷此都乘炎且快意吾寧忍須臾

移榻自怡園雨後納涼

水轉橋迴路幾層此中真可避炎蒸陰成繞屋三年樹
光吐疎籬半夜燈明月忽隨殘雨到微風已作早涼徵
野人慣領田園趣歸夢翻從借榻增

重過相國明公園亭四首

名園多在苑東偏，不數樊川及輞川。
綺陌東西雲作障，畫橋南北草含烟。
鑿開丘壑藏魚鳥，勾勒風光入管絃。
何似贊皇行樂地，手栽花木記平泉。

球場車埒互相通，門徑寬閒五百弓。
但覺樓臺隨處湧，不知風月與人同。
紫駝臥草平沙外，白馬穿花細雨中。
一片近郊農牧地，可容雞犬識新豐。

莫漫閒居比洛濱，猶從泉石見經綸。
栽花覘土知肥瘠，種樹因材識苦辛。
白傅龍門無俗客，薛宣東閣有奇人。

平生齒冷孫弘輩，車廐誰論舊主賓。
相國曾以唐實君
之品上達宸聽

熱客稀逢抵閑關，陪遊吾亦愛投閒。
隙中野馬飛揚去

雨後溪雲斷續還隱几好風來北牖釣簾落日在西山
壯心敢擬蘭成賦芳樹條新感再攀

浴罷與實君步入水磨作

長日愁經夏微涼晚似秋氣蘇風到面浴罷月當頭老
樹聽蟬立閒溪領鶴游飲牛兼洗馬何處辨清流

晚食

且喜蚊蠅少林深几簟涼飛蛾輕性命殘燭有光芒帶
草侵衣潤藤花落酒香魚蝦供晚食風物近江鄉

雨牕遣興示愷功

小雨密復疎虛牕深更綠瀟瀟延靜聽窅窅盡遐矚抱
葉無一蟬隔林下雙鵠雞鳴覺村遠水響知石觸殘夢

有時醒幽情恍相續眼前領閒趣取適聊破俗華髮脫
新梳輕衫便晚浴早衰易壯嗜外垢非內辱思營五畝
園未遂半生欲此身本如寄繆算徒碌碌菟裘等蘧廬
豈必皆我屬不如且聽雨濁酒賞鄰曲醉鄉有天地避
此六月溽歸計待秋涼無裝何用束

鷹坊歌同實君愷功作

風林蕭蕭夏脫木坊以鷹名似牛屋其中最大名海青
戴角森然異凡畜我初識名自遼史特產曾傳女真獨
楛矢同來肅慎庭初時底貢猶臣服屢求難厭禍旋結
兩國興亡手翻覆天教此物雄海東自長窠雛成一族
康熙 天子神聖姿駕馭英雄兵不黷每因纘武勤校

獵遠致竒毛比臣僕紫荆關外秋氣高狐兔寧容草間
伏腥風霍霍滿天地白日無光散原陸揚旌表貉出從
禽王用三驅力爭戮是時海青更精悍臂出綠鞵調養
熟翻身一去高沒雲注目秋空走馬逐蹄間十丈莽開
濶驀過林巒躍坑谷忽看天半挾天鵝奔電流星下投
速羽林健兒拍手咲奏凱不煩遺矢鏃却來斂翮復依
人仍以黃絛掣雙足三時飼養一朝用如許恩波等休
沐奉先性在饑附人定遠功成飛食肉不知給俸視幾
品肥瘦論斤常量腹生牛乍割血猶紅小鳥一吹毛盡
禿見人作勢俄聳肩獨立有時還側目無端對此我心
惻相向移時額顰蹙獅兒噉虎魚食蝦吞噬成風傷末

俗生意漸微真可嘆殺機欲動休輕觸以仁易暴古所
云恃猛爭強非汝福我願皇天仁百物常產鳳皇生鸞
鷲自然郊藪萃禎祥盛世多珍四靈畜

次實君溪邊步月韻

雨過園林暑氣偏繁星多上晚來天漸沈遠翠峰峰澹
初長繁陰樹樹圓螢火一星沿岸草蛙聲十里出山泉
新詩未必能諧俗解事人稀莫浪傳

大雨行

晚來怕熱喜聽雨臥看商羊獨足舞五更驚覺忽砰訇
搖動空城作雷鼓檐前急溜非一派併作飛濤湧堂廡
須臾暴漲床欲浮電火燒窻時一吐沈沙盡作十里坑

斫樹齊張萬人弩排墻隨瓦聲拉雜助以風威猛於虎
老翁折臂婦裹頭露立號咷到童豎城門兩日不敢開
濁浪如河勢難拒五行厥占屬災異疾痛况欲加摩撫
老夫昨日得家書見說吳田槁禾黍北方苦潦南苦旱
天大要是生民主可能造化一轉移坐使兩邦歌樂土

送唐實君遊江西

猛雨撼城城欲動粘天黃潦如霾霧阜城門外一丈泥
馬濺花髮四蹄壅問君此時有底急結束輕裝挾飛鞚

故人奉詔赴西江才子持衡推小宋

時宋念功編修典
試江右實君與之

同舊開東閣交最契攬轡南行邀與共文章取士意已
輕科目成名俗猶重如君致身本高第頭白挽強方命

中可憐進士不得進

李太白詩君為進士不得進

上積千薪

競傳枳棘爭集猴縱有梧桐偶棲鳳紛紜野馬巧乘隙
狼籍醢雞工覆甕侏儒飽死方朔饑曷不江湖且陶縱
我留輦下大可咲妄覲微名上鄉貢初聞逐客姑逡巡
旋悔為儒被嘲弄吹竽鼓瑟兩難強貫蝨屠龍等無用
布衣有骨天所憐老大寧能逐儕眾惟君知我謂我真
往往清吟托閒諷郊園木牀連曲尺荷氣藤陰滿香街
二字出昌谷集風光不礙冷澹遊日月正宜瀟灑送君今別我
忽徑去舍矢難追弦就控此邦山水要君詩豈獨飛雲
標畫棟匡廬舊有讀書地我昨留題滿巖洞待君再上
紫霄峰他日遊仙記同夢

姜西溟至都二首

三年一別兩蹉跎，短策重聞酒市過。
白髮舊遊諸老散，青雲同學少年多。
僦居那得高賢廡，支俸聊隨博學科。
幸是一瓊留故物，曾包老硯歷關河。
姜於滄州被盜故云

濩落生涯久自疑，重來咲我亦胡為。
曾從祖父承餘澤，只道科名似盛時。
逐客幸蒙寬後議，憐才何敢望新知。
不如蚤築畦風閣，結伴歸畊未算遲。

晚行裂帛湖上觀水勢

西山前夜雨暴漲，聲辟易昨日與橋平。
今朝露水柵晚來，覘盈縮又減三五尺。
一條修尾蛇東向，投遠碧菰蒲盡偃仆。
上帶泥土迹，我欲追躡之前行。
沃磐石初疑遇

壯士拔劔斫其脊徑開中已拆首尾猶跳擲却坐石上
觀平心隨所適有如杯底影仰面意旋釋人生駭愕緣
多伺躁妄隙歸來虛室中靜見鼻端白

甕山麓尋耶律丞相墓

裂帛湖東下馬行遙聞樵斧響丁丁盡髡草木非山罪
難向牛羊問墓名石椁千年誰不朽金椎一穴尚如生
我來忽墮無情淚土蝕殘碑恨未平

明末有人發冢見一頭加常人數倍

亟開之後掘得碣石知為公墓

青龍橋

甕山西北巴溝上指點平橋接碾莊自甃清渠成石塌
盡迴流水入宮墻殘荷落瓣魚鱗活高柳飄絲鷺頂涼

不礙蹇驢行，蹇蹇有人緩。轡正思鄉。

玉田觀早稻

灌園餘潤及平疇，千畝從無旱潦憂。總枯已供三壤賦，陂池新奉上林遊。神絃報榮秋長早，勾盾徵租歲倍收。別與豳風編月令，築場時節火西流。
官田早米例於七月初十前貢新

廢功德寺

瓦落空墻土盡崩，雜耕猶剩兩三僧。晨叅栢子留禪偈，夜看松花照鬼燈。駐蹕亭邊牛叻草，
明宣宗西郊省斂駐蹕寺中 釣

魚臺畔鼠攀藤

寺前舊有元主賞花釣魚臺

木球斗大今安用

木球事見

帝京景物略今寺中猶供之

自古琳宮有廢興

呂公洞輪菴禪師蘭若

只道山窮水亦窮，忽攀石磴與雲通。芙蓉殿底三重閣，
楊柳橋南一面風。老去文人多入道，從來絕境必凌空。
知君欲傲長江簿，佛號曾呼禁苑中。

絕頂有飛閣不可上，即金章宗芙蓉

殿故址

玉泉山

銷夏誰知別有灣，孤雲一角截西山。千家舊業鼃魚國，
十里提封虎豹關。欄楯離離金碧上，歌鐘隱隱翠微間。
清泉自愛江湖去，流出紅墻便不還。

玉泉山舊為金章宗避暑地，故首句

云

題相國永城李公所藏崔白健翮麈風圖

墨花一柄風翻荷，一葉展仰正不頗。傍添一葉作歌蓋，

上有健翮如天鵝初飛未高去水咫已覺遠勢無江河
生綃八尺畫止此妙手落墨寧誇多流傳要是北宋物
幸免小印鈐宣和若教藏弃入秘閣靖康那得逃干戈
永城相國鄴侯裔牙籤三萬森駢羅故家世寶此其一
鑒賞精絕知匪訛華堂五月開示客几席瑟瑟生迴波
君不聞濠梁大圖徑三丈天女織絹鳳擲梭江天十里
尚無恙賴有好句傳東坡東坡有題崔白大圖詩見集
中白濠梁人故稱濠梁崔
人間真蹟久難恃閱世容易千年過我詩淺薄不足道
請公自賦鑿風歌

愷功將有塞外之行邀余重宿郊園賦此志別
今年夏多雨所向泥塗妨君家近水園一溪綠泱泱謂

宜着冗士礪戶延清光豈惟洗塵埃直欲忘炎涼故人
督我嬾促我赴舉場明知計大謬聊逐槐花忙初秋束
書出臨行意迴遑儼居宣武門人海昏茫茫猶疑清夜
夢流水繞我床昨朝急足來扣門語徬徨聞子有遠適
結束隨龍驤腰懸八札弓行逐楯櫓郎可憐非汝好所
用違其長憶子從我遊翩翩富辭章十三見頭角已在
成人行今來猛績學下筆尤老蒼貫穿及韓蘇結撰卑
齊梁居然希作者恥與時頡頏玉之使有成遠到詎易
量重來忍言別戀戀林泉傍爲我掃庭除故榻仍在房
小雨灑籬落雜花間紅黃苦爲一宿留故意不可忘子
才百事能皇路今方將我衰萬念冷逝當返畊桑浮萍

寄波濤聚散原無常參辰渺河漢耿耿遙相望勗哉平生言卒以初願償無為愴離合萬里如一堂

早發良鄉至琉璃河驪背偶成

喚迴殘夢得清晨詩境重開又一新淡到明河猶見月

洗來灰洞已無塵

灰洞在良鄉之南

牛蹄應鐸行偏緩馬意驚

鞭策要頻慚媿琉璃橋下水鬢絲催換十年人

涿州道中書所見

折葦沈沙積潦餘高田成岸岸成渠胡良河上扶犁叟
網得萍根二寸魚

祁陽道中

一村榆柳一村鴉帶井沿籬路向斜野棗風輕時落實

木棉秋晚尚開花青旗賣酒竿竿影紅袖騎驢幅幅紗
迥與近畿風景別田莊從此屬農家

入旗莊戶至清苑而止

晉州署中與陳六謙話舊

魯拆聞邾境本連兩邦爭說使君賢

晉州與深澤接壤

歌傳馴

雉民方樂鳥化飛鳧吏亦仙却話舊遊如夢裏誰知岐
路判樽前難拋一寸西窗燭中有離居十六年

雨中重渡瀆水

路僻泥深出店遲一鞭照影又清瀆敝裘自領新寒意
歸雁如尋九日期倚樹風聲尤跋扈得烟柳色尚迷離
敢因遇雨嗟行役正是犁荒下麥時

大冉橋聞雁

殘荷老柳蕭蕭意秋在平橋水氣中年去年來一繩雁

帶人歸信是西風

時聞北關榜發
余名在二十

重至京師和德尹看菊詩二首

野景貪從廟市收瓦盆高下葢新抽風前最愛香盈袖
醉後還須插滿頭老圃別傳移種法故人來作看花遊
遲開自是關天意斟酌芳期在晚秋

一籬黃葉擁村莊嘆惜陶家徑久荒九日已過初泛酒
兩人相對忽思鄉古來佳節多風雨此後清吟耐雪霜
落帽臺邊回白首心情不似少年狂

送卓次厚南歸

多才能自愛失意問誰堪不作憤時語轉深吾輩慙柳

條攀欲盡梅信到應探鄉思因君觸心隨候雁南

陸澹成侍講新葺書齋名懷鷗舫招同人雅集

分賦

江湖宛在小牕前便欲從君借榻眠夢作白鷗歸未得
鱸鄉亭外水如烟

題畫贈揚州王漢藻

一路垂楊記泊船北湖南埭水浮烟君家舊住茱萸泚

別築灣頭小鞦韆川

揚州有茱萸灣故云

德尹將南還次韵志別三首

數過初冬又一旬誰知咫尺有參辰到家歲月驚新曆
題壁詩篇記暮春雨雪暗侵搖落候冰霜偏老別離人

獨留真覺無聊賴擬學揚雄賦逐貧

自笑逢時術未精人間無用是虛名家門似我慚為長
才器如君合晚成別館能無三宿戀歸途只要一冬晴
最憐今夜霜天月畫角吹殘布被輕

小榼三升蕢凍醪也應與爾慰牢騷不因富貴思彈鋏
或有英雄辨捉刀風雨慣曾憐弱弟田廬忍便委兒曹
丁寧一語煩相誠畫虎休輕學伯高

大風出西直門至自怡園愷功方擁爐讀史

萬斛沙如萬斛潮捲空殘葉剩枯條到門日影龍蛇活
拔地風聲虎兕驕十里欲迷城北路一鞭重渡苑西橋
圍爐薄雪年時夢留取閒人話寂寥

題王令詒松南柳磯圖三首

自截筠竿八尺餘，偶從沙際伴春耒。人間果有絲綸手，未必臨淵便羨魚。

曾是春衣染汁新，一官臨出又逡巡。萬條楊柳風情在，猶戀當年手種人。

三畝菱租割水田，披圖閒惜好山川。歸人預作明年計，欲借橋東放鴨船。

洞庭秋望圖為同年姜西溟題

我昨扁舟帆

去聲

湖水出沒鷗群鳧，隊裏西風吹偃萬梢。

蘆斗柄插空將北指

庚午秋冬間余寓居洞庭東山

君時正作桑乾客

南北相望渺千里，念君落第招君歸。已是明年三月尾。

其秋我復遊廬阜走上雲頭振衣履海綿片片盪吾胸
竒絕生平乃有此洞庭直可盆盎貯七十二峰同撒米
有如天半立峨眉下視成都居井底君為此圖母已隘
細寫秋毫入側理男兒失路真可憐澤畔行吟聊復爾
今來又赴京兆試失固其常得差喜與君同榜獲聯名
王後雖卑吾敢恥却披橫卷索新句一咲如臯方射雉
才名誤汝四十年決踵何堪比截趾 至尊久已記名
姓虛向蘭臺署良史探支官俸月一囊揮灑傭書日千
紙須長及腹誰攬之髮白滿頭行老矣向來蹭蹬天有
意特與先生慰暮齒眼前同進俱少年感歎無端從此
始翻思舊狎漁樵伴故展烟波洗窻几不然此畫且善

藏勿更題詩乞餘子

座主侍讀徐公將南歸感恩述事六首

公竟飄然賦遂初，輕裝如葉稱懸車。
自編永叔歸田錄，誰上何蕃伏闕書。
臘雪寒消傳盞後，春颿夢穩挂冠餘。
白頭別有千秋業，或恐名山勝石渠。

特簡初傳出禁林，文章曾結主知深。
敢云得馬非初

意，莫誤飛鴉是好音。
魚尾經燒憐短鬣，桐材入爨辨孤琴。
恩牛怨李翻多事，只要群公識此心。

貫魚立鵠萬人看，盡掩雲羅事最難。
那得高才皆入彀，每聞餘怒必衝冠。
向來清議寧隨俗，從此朱絃恐廢彈。
不信滔滔將日下，江湖無計障狂瀾。

水底含沙豈有因，何當舉國逐浮塵。
險經負羽沈舟會，勇作抽帆到岸人。
難挽頽風歸太古，獨迴天意入陽春。
漁樵一席誰爭得，私第歸來尚角巾。

虛舟飄瓦閱人情，得失心恬氣自平。
駿骨孰緣千里重，鴻毛公視一官輕。
同朝盡諒憐才意，聖代能全去國名。
惟底青衫添別淚，十年門下舊諸生。

絕無聊賴住京華，年去空歌蘇幕遮。
枯樹忍攀前度柳，新霜誰護後栽花。
愁來客况渾如醉，身在師恩豈有涯。
贏得陸公為舉主，儘容開口向人誇。

毘陵揚青村謁選得普安令王石谷為作黔遊
圖索余題句兼以贈別

萬尖石筍高刺天日氣挾霧生黃烟盤江中截兩崖斷
高緼一道虹蜺懸尋橦裊裊度空際下有千斛蛟龍涎
普安孤城小於斗險扼地勢當黔滇城頭置堠城下驛
官舍坐見行人肩楊君一官乃落此幸是熟路無迤邐
憶君年當十八九白面便已能談邊趨庭萬里不辭遠
直過瘴嶺隨飛鳥辛酉夏秋青村省其尊公秋屏憲副
於貴西官署余時遊黔始與相識
是時西南屬兵革郡邑疾苦方顛連爾來休養踰十載
瘠土已變桑麻田朝廷况下寬大詔積賦逋稅新除
蠲君今乘傳又重到何異鳥化雙鳧仙畊烟散人好事
者遠境寫入秋毫顛山川歷歷都在眼我愛此景非從
前小詩或可當別操待爾譜入琴堂絃

寒夜同王令詒魏水村顧書宣家可亭姪集揚

晚研庶常齋分韻得寫字

官閒門徑僻歲晏人事寡厭俗謝交游往還惟舊雅儻
居適相近踏凍免騎馬巷北召王猷巷南邀魏野顧生
住西弄寓舍喜新假我至每劇歡招呼臂同把北風吹
天晴城上烏啞啞寒光潑初月殘雪猶在瓦此時不作
達可惜白玉笋地菘翠成菹水族鮮製鮓盤餐媿鄉味
口似墓頤哆隣沽雖稍甜轟飲亦聊且晚研以不得佳釀故其詩有濁
酒甘同昵惡人之句我生類知分即事有取舍正如熊掌魚那得
兼二者十觴竟連酌塵面為一赭主人負詩才劈紙給
揮灑敢辭押強韻數子賴陶冶吟從夜枕續臥聽街鼓

打所恨不善書當令阿買寫

僕舊有青田凍石一枚歸晚研六年矣頃遇范
子方仲於京師范精於篆刻許為我摹小印而
此間覓佳石不易得意欲晚研反我故物作詩

先之

鑿石雕蟲魚此舉誰作俑後來琢山骨價以大小珙匹
夫懷竒珍惴惴初抱恐連城既入趙負曲敢虛擁和璧
竟歸秦陋邦手徒拱自茲嗜好捐萬事成闡茸殘編任
飽蠹退筆詎銘冢空憑咄咄書硯乏纖纖捧何當餘結
習往往吟肩聳好事偶分牋塗鴉每慚悚丹砂綴小印
紙尾母已元范子故見嗤剗敝寶非種擲地作石聲從

旁乃憇愚當時巾笥蓄有若蛾化蛹去我今六年居然
戀新寵刻舟勞記劒觸物心猶竦昨日聊叩君機鋒鬪
針孔秘藏戒輕出防我或好勇攫之寧非顛健者豈惟
董輸攻力易竭墨守計仍鞏不如且姑緩靜俟天倪動
竒巧出窮人詩端忽噴涌明朝走尺蹠待命不旋踵盟
渝息壤舊歸視汶田重在我猶在君報章行及奉

晚研見和前篇謂余有新蓄壽山小石援東坡
海石之例欲以此易彼重違其意割愛分贈二
枚再次韻速其踐諾舊石之歸有日矣來翰有
邀令詒水村書宣三子屬和之語兼以示之

假道蓋有由兵端實始備君如早識此堅壁却吾珙遂

巡不入境下邑方惶恐奈何昧厥初納賂覲私擁青田
吾重寶掌握失把拱豈無他山攻頑曠棄紛茸壽山快
新得餘子欲奪冢炯然珠玉光入掬似可捧圓者廉角
殺方者風骨聳昨偶出示人旁觀盡驚悚老夫喜省事
羅列稍嫌冗因憶巨璞完吾家有遺種作詩乞故物致
語極慙惠兩日縈我懷有若絲纏蛹君初非豪奪繼乃
絕矜寵故以文滑稽發端特高竦錙銖責施報計策到
桑孔平生怯小敵今見大敵勇肯為城下盟執筆恥南
董相持兩不決京索成臯鞏飛書奏竒功小利戒輕動
叩關索敝賦彼勢猶洶涌割愛忍須臾禮成門欲踵中
原有好會信義隣邦重後約勿更渝槃敦吾將奉

門神詩戲同實君愷功作四首

賺得兒童仰面看，影纓絃服最無端。
國門他日曾懸價，駟儉何人敢賣官。
丞相魚魚工擁笏，將軍躍躍儼登壇。
星奴結柳翻多事，五鬼爭彈貢禹冠。

揚着氣色任充閹，比較門風孰不如。
幾見華楹留故帖，偶繙新曆當除書。
關能拒客非關汝，錢可名神儘讓渠。
久閱人情吾勿怪，過時光景合交疎。

虎豹森森列幾行，誰教骯髒倚門旁。
通侯湯沐虛傳漢

陳平封進士科名尚冒唐
用鍾魚鑰同時司啟閉，雀羅

戶牖候終歲有炎涼，相逢白日多魑魅。
乞與先生却掃方

慶虜歌裏撥寒灰，歲酒逡巡酌一杯。
凡鳥有人題字去

敬業堂詩集卷十七
冥鴻幾個挂冠回好官第宅多相望野老柴荆宵浪開
直與歸人占吉夢也煩呵護不祥來

敬業堂詩集卷十七

敬業堂詩集卷十八

海寧 查慎行 悔餘

白蘋集

起甲戌三月終六月

甲戌二月將出都作詩留別諸同年座主清谿公
見而垂和有下第情懷刀劒傷之句蓋用東野詩
語也時公亦將南旋買舟通潞命余隨行東野不
又云乎棄置勿復道楚情吟白蘋他日舉以似公
公曰子庶能自廣矣

下第南歸留別同年姜西溟廖越千劉入山王
崑繩李若華諸子二首

一顧人間事不輕敢將汲引望公卿張羅天遠鴻雙去

彈鋏心粗劔一鳴誤喜青燈回昔夢枉煩芳草勸初程
歸人別有看花約明日騎驢便出城

明知歸計尚茫茫且作無聊別帝鄉下第兒還添客累
當歌酒或替人狂膏肓痼疾貧難療須鬢流年老易傷
聚鐵豈堪頻鑄錯早收心力事畊桑

虞山錢劬谷屬題采藥圖二首

小年長日正遲遲算是樵柯欲爛時大抵人情多好勝
偶逢仙敵亦爭棋

玉柱金庭境久閒頗聞巖谷異人間長鑱誰斲雲根斷
片片飛來盡出山

奉陪座主徐公遊一畝園次吳京兆韻

履綦陳迹已多時

乙丑秋先生召同
人於此地雅集

十載重游醉不辭

初綻柳如時態軟未開花為閏年遲
罷官樂事苔邊杖
去國閒情局外棋
又是一番寒食過
錫簫聲裏雨如絲

張灣舟次留別姚君山別峯兄弟

久作京華客今知去住難
老方隨計吏名不上春官別
酒青燈戀離程白髮拚
眼明楊柳岸稍喜見桅竿

馬坊口大風送劉大山還京次座主韻

明波如鏡瀉天津
忽捲狂飈萬斛塵
酒色難寬臨別恨
楊花只似未歸人
家貧不信貪為客
母在尤應重此身
重過杏園休悵望
等閒狼藉道旁春

天津別姜西溟次韻

同是春風失意時送君真覺拙言辭杜陵旅食經年久
熙甫才名一第遲青鏡從渠增算髮白身輸客賭殘碁
老來別緒兼師友那得并刀剪亂絲

晚泊獨流

關城春向盡小艇下津門風止橋形直潮來水氣渾蒲
魚喧晚市櫻筍憶鄉園歸路三千外從人屈指論

滄州阻風謝別峯同年餉酒二首

風程半日滯滄州客恨除非醉即休安得春江變春酒
薩摩陂外水如油

青旗夾岸酒家樓正坐囊空價莫酬慚媿貧交分一斗
為余親典黑貂裘

大龍灣阻風奉次座主原韻

有聲南來猛如吼白日無光移
卯酉荒灣曲岸萬木僵
摧折萌芽比腐朽蛟螭勢奪
虎豹窟塵堞居前砂礫後
舟行逆水兼逆風或跋其尾
或掣肘天公如醉意未豁
人事徒施力何有先生晏坐
百怪恬萬籟無心發于喁
已憑忠信涉波濤更列圖書
環左右詩成一咲自投筆
臥拓篷牕見星斗江河日下
是知津高浪攤錢輸水手
青春忽忽乍經眼平野茫茫
一回首此時看客挂征颿
何異癡狂中風走乘流習坎
吾有命底用旁觀別妍醜
熟諳世路忌爭先飽閱人情
能耐久蹉跎不負遂初計
神貺先生亦良厚檣烏斂翅
旗脚迴頃刻雲衣變蒼狗

鄉程有期行漸近
梓飭嘉魚樽貯酒
朝南暮北待公歸
肯讓山陰採樵叟
千點桃花一葉萍
鷗波正漲苕溪口

德州同年李文衆招集見可園二首

東風有約出京華
弭櫂相尋到水涯
得地百年因種樹

留春一日為看花
明日立夏亭臺縱好須賢主
子弟多才必

世家直得此間成
茗芋甕頭墨露不須賒
墨露德州名醞也品在盧

酒之上

槐陰小徑轉閒坊
猶記田家舊草堂
田紫綸司寇馬津草堂去文衆居半

里余去春同歸路重經疑
昨夢名園欲別惜
韶光濃熏

康飴過之酒氣茶縈架
翠滴苔痕薜荔墻
最愛一軒幽絕處
紫藤

花罩讀書牀

四月十五夜鄭家口對月以江清月近人分韻

五首

孤舟淹旅程初過平原郡樹色燕帶齊河流衛交汶可
憐一輪月偏與愁人近已經連日風更怕宵來暈一笑

起推篷清光吾有分余得近字

明月窺我舫我影在船窻我起却望月影落玻瓈江人

影與月影無端各成雙泡幻豈有情妄見生紛麗不如

抱影坐閉目心自降右和江字

風止波亦息濁流同一清小杓夜分江龍頭注茶鐺須

臾波心月却向杯底生我醉竟吸之謂是方諸精孤光

入懷抱耿耿留空明右和清字

隣舟悄無聲高臥如避月此時斂舷歌撫景更清越密
疑穿荇藻細可數毛髮微風蕩酒襟涼氣入詩骨統如
打五鼓蓬鐺猶未没

右和
月字

京城豈無月眯目多飛塵從公作上元忽然涉殘春扁
舟落吾手日與魚鳥親始知天壤間清輝屬閒人行行
莫回顧永結江湖隣

右和
人字

重過臨清感舊

傷外舅陸射
山先生也

重經淹泊地往事獨心驚客路貧相倚歸舟病不輕百
年隨夢斷孤月傍愁生流盡州門淚潺湲是水聲

初入牖

河縈千里曲岸束一門高不有乘流便誰知上牖勞木

痕深記筮石眼密密篙咲拍長年說吾舟聽汝搽

次日連上戴灣土橋二牖晚抵梁鄉和座主韵

一月郵籤算水筒快從入閘奏竒功柳綿渡港船船雪

麥浪翻田岸岸風尚有貽封尋晏子

梁鄉屬堂邑晏子食邑也

不教

隴吏惱韓公河神伎倆全無用鼻息如雷耳正聾

阻牖

健水分支總入漕客程守牖似填壕忽飛瀑布簾垂地
旋滴珍珠酒壓槽鵝鴨淘沙還善沒魚蝦出網竟如逃
人間行止原難料小住差償昨日勞

聊城和座主作

談咲封侯事不難西歸仍作布衣看紛紛眼底皆商賈

只是人情戀此官

南旺分水處

一綫分鼇背千帆掠馬鬣江河方日下南北此居中水
氣空灘雨槐陰古廟風兩朝溝洫志但策轉漕功

即目二首

關吏逢迎堠吏譁飛流一道走京華綱船果熟盆池樹
驛路香馳御苑花長見名材充土貢幾聞中使出天家
荔枝龍眼隨年例笑指炎荒萬里賒

子弟梨園舊賜緋樓船南下疾如飛衣冠氣盡魚龍雜
帷蓋恩深犬馬歸桃葉何心隨短楫楊花多事打春旗
就中別有青衫客聽到琵琶泪暗揮

韓莊閘口望嶧山湖

嶧山鑿石東作隄天勢半落陂湖西湖波吞天入豐沛

日脚插地生虹霓

湖西為沛縣

芒碭雲氣忽斑駁倒影摩盪

青玻璃須臾水光變深黑湟盡萬古蛟龍泥洪濤怒挾
風雨至列岫出沒頭皆低呂梁直下二百里但見漁舠
散亂隨鳧驚琴高可跨吾徑去誰能臥壓蓬底同鷄栖

新河

別穿地脉轉龍腰新插荒堤柳萬條故道視同甌脫地
小兒爭唱復陂謠陽侯受職工粗就幽鬼啼墳骨已銷
莫道治河無善策主恩存歿冠群僚

出牖後順流揚帆

牛頭灣接猫兒窩小船出牖如擲梭客程已過十六七
歸夢尚隔江淮河鳴鳩催雨麥秋近貰酒配魚蒲節過
黃流正報落槽信更喜枕上無驚波

天妃牖

淮勢今年盛洪河不敢侵濁流三舍避清漲一篙深瞥
眼移蘆汊回頭失柳林生來供作帚容易待成陰

王楚士惠鮓魚二首

南歸一飽願無餘正及江淮五月初值得老饕開咲口
河豚嘗過又鮓魚

辛苦漁榔逐販鮮江城一尾賣千錢朝來下箸還三歎

半月前頭遇貢船

四月抄在濟寧鮓魚已入貢矣

雨後過馬寒中山居

君家葫蘆山我家菖蒲港山淺游可屐港狹行礙榜塘
南十里餘野色平於掌田塍針水足夾路新苗長兩夫
有一輿四足比雙槩前行忽坐睡縹渺入無想漸聞竹
樹聲出谷遙清響到門山亦住斗室寬且廣尊卣間圖
書目存不暇賞主人爲指似一一開疑網我老嗜好蠲
因君覺背癢興來乍飛動偶發難自強昏昏燈吐籬灑
灑酒浮盞不辭日過從所願歲豐穰明朝雨決渠濕氣
潤流磔奄觀早稻熟後約赴秋爽

原蠶行

村東村西桑葉綠頭蠶不熟一蠶熟薄於片紙白於脂

五月南風齊上族，繅車聲中湯百沸。出釜持將易斗粟，
去年苦旱秋不登。民命全憑寸絲續，我聞周禮有成法。
一歲不容種再浴，蠶多害馬理或然。物類區區別田畜，
國家官馬百萬強。惜薪監督煩曹郎，口外官馬設內務府郎中歲收馬矢
變價歸原蠶微利幸無禁，勸汝努力須栽桑。田夫暑雨
惜薪殿，多咨怨不如且喫蠶娘飯。

秋鳴集 起甲戌七月盡十月

蟲之鳴秋候至適然爾而昌黎以為物不得其平
則鳴余非善鳴者也特假蟲之鳴以自文其詩若
云其志弛以肆則吾豈敢

送王子穎赴龍游教諭任

子弟芙蓉幕先生首荷梓儒風吾土近師道此時難屈

首居貧地安心送老官所欣賢尹在臭味定如蘭時繆虞良

以名進士為是邑令故云

朱竹垞表兄屬題小長蘆圖用阮亭先生體賦

五六七言絕句各一首

君住鴛鴦湖儂占鸕鷀浦一統志云鸕鷀湖在海鹽西南四十里今其名無可考當

即黃道湖去余居十里同為篔簹翁貫聽菰蒲雨

種魚三畝五畝隈水前溪後溪認得隣莊老樹草堂在

鸕鷀巢西

白首初辭供奉班一身那不愛投閒江湖老伴多星散

知己無如父子間

德尹閩歸戲調之

盧橘楊梅已過期
別來鄉味剩空枝
八千嶺路到家日
算是荔枝初熟時

補和大司寇徐公遂園修稷詩限蘭亭二字二

首

別起林園十畝寬
築亭何必更名蘭
杯流細浪魚鱗活
花補新巢燕羽乾
春事無如三月好
人情特去一官難
吳中父老矜稀見
每到佳期約伴看

獨擅千秋著作庭
文躔光透老人星
官同白傅歸仍蚤

樂天以刑部尚書致仕
史到溫公局未停
妙手成圖初見畫
高僧

入社亦忘形
分明洛下風流在
不數詩家曲水亭

清流山瞻支公塔

石路秋花艷沙田早稻香壞墻連廢寺古塏表平岡境
寂蟬聲合松高鶴骨涼永和年號在苔蝕不成行

天池山寂監禪院

荒榛下接瓜芋區微徑漸上多縈紆山果甘垂紫桑椹
僧廚脆瀹紅竹菇山中所產味最佳三間古殿石將泐一眼碧
泉秋不枯我來登眺試脚力且喜未用青藤扶

過文與也竹塢草廬

坐閱滄桑五十年不知顏狀已蒼然世家文物傳詩畫
相國衣冠傍墓田文肅公未第時讀書丙舍喪亂後即附葬贈公墓旁亂竹巧遮
行藥徑濁流閒送出山泉丈人有福能高臥一榻秋陰

萬樹蟬

夜至當湖訪李辰山不值

風色晚尤惡扁舟逆浪翻
渠添浸稻水雨熟種薑村
遠火欲投岸孤城將掩門
到來還躑躅疎磬報黃昏

沈客子舊寓都門所居名獨樹
篠自撰七言古詩曹實菴錢玉友湯西厓皆有和章今來索余
補作仍次原韻

沈子清才在塵埃有如菡萏生淤泥
又如服鹽駕鼓馬下有逐電追風蹄
青衿蚤爲命所制百甕未了酸寒糞
三年四門作都講啄粒亦到官倉稊
人中嵇紹本易識孤鶴氣壓千群雞
家家朱門當大道爾獨隘巷尋卑棲

歸來欠伸看礙戶一咲入戶頭仍低空庭得樹翻自喜
有滄仰視雲萋萋忽驚霜禿九秋幹旋見雨長三春蕙
隋巢晨拾赤脚婢落葉夜掃長須奚問君此間亦何樂
乃挈穉子携山妻狂來對客發高論塵柄手捉談天犀
北郭槁枝聊隱寓東方窶藪真滑稽孤松祇宜伴彭澤
五楸大可娛昌黎翻身買擢竟南下野性終近深山麝
故園喬木正合抱町疇旁接澆花畦昨非今是恍夢覺
涉脚尚淺幸未迷伐檀河干等無用美哉河水清漣兮

塘西訪張介山病

十年小別隔江淮重叩溪南煮藥齋醫可活人偏善病
闡非拒客况吾儕名場交作吹蓬冷老境詩同噉蔗佳

一髮弁山青到眼吳興游屐與誰偕

初意欲約介山同遊湖州故云

哭同年王載安

判袂京華半載餘扁舟歸造故人廬不圖別後遊難續
只道秋來病已除五畝未曾營世業一名無復上公車
讀書已悔生涯誤還望孤兒讀父書

張權六招同許舜功王載南兩學博及兒建泛

碧浪湖徧遊近山諸寺觀次東坡汎舟城南會

者五人韻四首

葑田秋漲碧鱗鱗依舊清風起白蘋且喜此遊客我輩

不知當日定何人

五人者自蘇而外皆不著姓名鱸魚入饌羹尤美鷗

鳥迎船意亦馴載取烏巾名釀去黃甘寧數洞庭春

木樨香透老僧齋，爽氣宜人樹樹皆。
詩興賴君多撥觸，秋光爲我洗塵霾。
峴山客到茶如雪，箬水船移酒似淮。
已辦芒屨斑竹杖，丹梯隨意轉雲階。

道峯負石還兼土，遠岫當窻晴可數。
花到秋林不喜紅，竹生幽磧何妨苦。
平鋪稻壟翠千頃，高引炭烟青一縷。
斜陽緩緩送遊人，出谷猶聞上方鼓。

佳處溪山意未厭，塔鈴一角響風簷。
烟波野渡初迴棹，燈火河房半捲簾。
愛客不嫌官獨冷，過時誰道日長炎。
敢誇豪氣除難盡，痼疾聊從好友砭。

雨中奉陪座主徐公及韓丈子蘧放舟夾山漾
欲遊樓賢不果歸登峴山作四首

過盡迴谿十里長孤城回首漸微茫風鯉曉氣魚蝦斲
水減秋痕鴈鶩鄉菱蔓欲牽絲已脆荷花雖敗葉猶香
船頭忽指前遊處白塔紅亭認道場夾山漾在道場山之陰
野色天光入望竒融成一片綠琉璃展開手卷王濛畫
收拾才情杜牧詩畢竟清遊宜寂莫尤難好景是迷離
桃花莫被漁翁誤秋在斜風細雨時

選勝初期汗漫遊棲賢不到恨空留橋低忽礙尋山路
興盡非關冒雨舟瓦竈分泉烹紫笋印泥開甕試清芻
買田合向吳興住蟹舍魚莊一網收

亂石多成劈斧皴窪樽亭外勢嶙峋一州文物傳孤碣

逸老堂明世廟朝鄉先生劉南坦顧箬溪創碑尚存前輩風流剩兩人屏擁弁山

高簇簇簾鋪雪水細鱗鱗名園長泊鷗波畔

座主新買一舟名秋

水園細數陪遊第幾巡

中秋鳳晨堂讌集

吳興我初到風景值清美縱為冷澹遊亦戀佳山水矧
迺多良朋盍簪履錯趾十日九放舟波光嵐影裏夜歸
漏必下旦輒扣門起如此以為常行期難準擬中秋節
漸近未到先屈指朝登鳳晨堂少長各就齒森然敬愛
客未覺肴核侈是夕雨忽晴天容出新洗華鐙挾朗月
潑艷落杯底倒影射空堂濛濛烟霧紫談諧雜絲竹觴
政不暇理我醉問主人雅集歲凡幾答言良會難雲散
波旋委自從庚申後十四五年矣

庚申春吾邑陳寄齋來作社集

同學

近無多含情侯知己此邦富人文槃敦執牛耳耆英洛
下社子弟高陽里往往前輩交久要或在此平生好求
友出門失桑梓落魄肯見收同心庶堪倚溪山勿吾咲
來往自今始

鄭春薦唐殿宣諸子招集湖舫二首

萬株老柳陰猶綠四面青山影欲沈此段秋光真冷落
孤山不泊泊湖心

誰遣秋娘來喚渡忽攜風雨到尊前老夫借得纏頭費
無數跳珠盡入船

明日再飲春薦宅座有濮姬吳人也姿性明惠

臨別口占四首

故人道我風情在別選紅粧勸酒卮不料窮歸無好句
累他羅帕乞題詞

絳蠟花開照卸頭眼波入鬢却橫流問渠肯顧含何意
一笑千金異日酬

落拓生涯大可憐江湖人老杜樊川倦游雙鬢無多白
白盡紅燈綠酒前

風雨催人向婺州輕裝半月算歸舟富春江外無潮信
鴉舅霜紅在晚秋

時余將
往金華

雨發江干

晶晶江光去昏昏海氣連雲沈離岸樹風漲落潮天熟
路便孤客輕裝稱小船十年遊跡在重檢舊詩篇

富春舟中先寄桐廬學博吳鹿砦

朝發定山村暮投富春渚清江帶小郭檣影稀可數已
飽挂帆風猶聞滴篷雨山環水疑盡水轉山復吐本為
寂寞遊未覺應接苦桐谿喜漸近中路有賢主

劉南村署齋向鹿砦夜飲二首

浙西山水縣最好是桐廬地僻本無事君才長有餘秋
林聞割漆晚岸見留魚許我來相就嚴陵好卜居
故人多薄宦解后見交情燭院三更話風江半日程山
肴蒸栗熟法醞帶泉清醉裏騎官馬星光照出城

舟次桐廬聞唐實君補授儀曹喜而有寄

謁選初聞欲赴秦

唐已選朝邑令
奉旨特留

改官特荷

主恩新

起家科第原難料得路文章洵有神東閣游揚因客重
南宮期望感君真欲知喜動江湖色忘却身為失意人

巖灘早發

紈如鼓打巖頭戍催起栖鴉天未曙飛星過水如有聲
苦霧迷津忽無路長年眼昏心手熟已報前灘暗中渡
遠氣朧朧日射穿秋光紅上巖陵樹

由蘭溪縣坐茭白船晚至金華

疎林野岸開平遠漠漠江天秋向晚陸龜蒙鴨戴嵩牛
一帶村家供畫本赤松門外問長年拍似金華小洞天
偶然走入羊群裏去作人間狡獪仙我與初平稱莫逆
重來已是千年別可惜巖頭乏主人亂山依舊堆頑石

登寶婺樓

斗杓倒插勢凌虛，高出城端五丈餘。
一雁下投天盡處，萬山浮動雨來初。
別開戶牖通呼吸，旁引風雲入卷舒。
八咏門荒詩境改，讓他仙子占樓居。

金華趙鹿友明府招同家春谷兄賞菊

四先生里古金華，循吏如君自一家。
早稻喜嘗豐歲酒，秋庭閒放午時衙。
官同彭澤宜栽菊，客到河陽許看花。
猶勝寒糴貧博士，朝朝巖洞訪烟霞。

春谷兄時爲府學教授，故戲云然。

歸舟雜咏六首

湯溪蘭葢及秋香，覓本猶煩遠寄將。
多謝故人先損惠

兩頭載酒作重陽

教授兄許覓秋蘭見寄舟過蘭溪陳進士紫馭以名酒相餉故並及之

南遊何事太匆匆及取歸帆半月中
轉盡清溪三百曲
萬株烏柏一霜紅

恨不清江處處灘
一聲鳴櫓下奔湍
來舩莫妬歸程速
我亦曾經上水難

昨到金華洞口還
明朝又看浙西山
風前自覺衣衫重
穿過千重濕翠間

青山漸遠漸模糊
散入雲烟澹欲無
畫手稀逢王子久
詩家別寫富春圖

滾滾秋濤浩浩風
烟茫茫處雨濛濛
不知誰割東西界
半幅江山展越中

初換烏篷舩

濤江日夜攪秋天聽雨聽風那得眠莫怪朝來貪晏起
烏篷夢穩越人船

山陰道上

道德經翻晉永和書家好事例傳訛至今似帶羲之癖
風俗村村愛養鵝

重陽前一日至越州自太守以下地主無一人
在郡者即日返棹作此解嘲

夢寐平生慕越州偶然訪舊作東遊半醒半醉他鄉酒
黃葉黃花古郡秋九日溪山無地主一天風雨在歸舟
此身到處初乘興興盡誰能更強留

晚至西興

魚菱論斗米論斤蟹膏擘臍鱉割裙豐年亦覺旅食好
一飽媿與居民分詩人好游無定處乘流則行得坎住
吳山滿眼待登高暮雨西興挂帆去

贈紹興太守王憲尹

千巖萬壑浙江東典郡聲華迥不同七十葉傳王內史
二千石視漢三公誇人詩句蓬萊上寓意文章山水中
誰似先生觴咏地蘭亭原是舊家風

閱邸報知揆愷功改官翰林侍講喜寄二首

邸報傳來遇絕竒才名一日動丹墀不矜官爵由門廕
獨愛文章結主知跛鱉敢爭騏驥路拙鳩休奪鳳皇
池未妨小變平生格從此須工應制詩

知子無如我最真性情長與一編親有才畢竟難埋沒

此事曾經共苦辛草閣孤燈回白首荷塘昨夢隔紅塵

記去年沈吟為感傳書意可少當時唱和人時愷功屢馳札促余

銷夏事北行東江已補官禮部故並及之

敬業堂詩集卷十八

敬業堂詩集卷十九

海寧 查慎行 悔餘

敝裘集

起甲戌十一月終十二月

入都凡三度多在春夏之交未嘗從風雪中跨驢也甲戌重陽後自金華歸里兩接愷功札促余北行遂於長至前五日束裝一羊裘已十五年裘則敝矣而行役尚不知止可嘆也

敝裘二首

中道誰能便棄捐蒙茸雖敝省裝綿曾隨南北東西路獨結冰霜雨雪緣布褐不妨爲替代綈袍何取受哀憐敢援齊相狐裘例尚可隨身十五年

冷暖相關老倍知，黑貂何必勝羊皮。
留同敝袴非無用，好比緇衣或改爲。
取醉難償村店值，有人還當釣蓑披。
家貧舊物無多在不忍吹毛更索疵。

山塘與德尹別

歸何草草出匆匆，聚散全非意料中。
長路一痕添日綫，是日征衣幾縫裂霜風。
朱論去國經年別，且喜停舟五冬至夜同。
記取欲眠頻坐半塘橋，北虎丘東。

家二瞻兄八十壽

我觀造化初無權，仁者自壽其天全。
老翁小兒兩遊戲，直以渾沌還吾天。
不爲物用而用物，歎洩元氣成雲烟。
古來絕藝兼者罕，鍾王顧陸名各專。
輞川摩詰書未稱。

三絕獨數滎陽處，眉山海嶽不復作。松雪兩派猶相沿，
先朝倪沈及文董。筆力亦足追前賢，吾兄妙手靡不備。
書法入聖詩能仙，偶然點染作圖畫。別有天授非人傳，
興來百紙一掃盡。散去半落雞林船，貴游踏破鐵門限。
欲乞尺幅終無緣，有時自銘退筆冢。經歲或乏看囊錢，
乃知此事因品重。兄豈自負人云然，維揚地薄耆舊少。
流寓欲占文星躔，今年九月屆大臺。初度恰在重陽前，
一門諸弟頭盡白。謂楷五秋山兩兄茱萸醉插隨兄肩，羨兄晚
節比彭澤。祝兄添丁如玉川，兒年二十翁百歲。及看舞
袖黃花邊。

題從孫汝誠倚劔圖小影二首

櫺具橫腰首，祿巾天然秀。骨出風塵乃，翁已被從軍。誤

傷尊公
荆侯

勸爾休爲佩犢人

羲獻門風世共推

汝誠爲二瞻
兄嫡姪孫

階庭蘭玉總多才，自言

劔術通書法，曾看公孫妙舞來。

發揚州留別汪庚齊

旅况殘年最不堪，何期解后作深談。向風嘶馬程程北，
背雪飛鴻片片南。殘燭乍移寒減半，征帆欲挂酒行三。
隋堤柳態禁搖落也，傍汪倫百尺潭。

夜宿邵埭

水柵千家市，烟村十里橋。蘆灘聲雪雪，燈舫影搖搖。風
止鷗機息，寒深酒力消。獨眠無好夢，愁度最長宵。

淮浦冬漁行

長淮冬涸成溝渠風雪夜折荒洲蘆小船冲冲鑿冰去
冰面躍出黃河魚衝寒捕魚作漁戶手足皸瘃無完膚
三時轉徙一冬復淵數偶寄蝸牛廬無田不得事農業
有水尚欲輸官租自從十年淮涸滿平地下受滔天湖
誰驅鱗介食人肉漏網幸脫鸞刀誅得時黿鼉聚窟宅
失勢魴鯉充庖厨眼前竭澤有餘憾取快報復聊須臾
但看明年春水上魚鱉又占居民居

輓喬石林侍讀

本朝治水關全局東下狂瀾勢難復先生獨以手障之
言卒施行身蚤逐微車北去全家懼昇櫬南歸萬人哭

百年陰德被淮揚公在九原應瞑目

從孫恒侯自淮安送我渡河口占志別

吹斷西風雁一繩離情鄉思兩曹騰醉衝白日孤城霧
曉渡黃河十里冰去意隨蛇遮不住識塗如馬老偏能
未應輕別淮南路隻影從挑夜夜燈

逆旅行

用王半山
轉韵體

行人爲客居人主聊以稱呼代爾汝入門不揖出不辭
主今知客却爲誰等閒無事休爲客幾個相逢尚相識
相逢相識非不多賢於逆旅能幾何

宿遷遇巡河使者

使者冬行水居人歲避河甃時停畚鍤何計脫風波賦

歛殘年急隄防下策多皇華期盡職報稱意如何

邳州道中雪

野濶黃河岸天低下相城幾家沙際沒單騎雪中行漸
壓輕裝重俄添老眼明路難兼歲晚那免嘆孤征

雪後風日晴暖

陰霾一夕解重圍頓覺朝來朔氣微得暖渾如杜康力
殺霜終是趙衰威細流飲馬知冰釋殘雪隨風作絮飛
至竟村翁勝行客茆檐晴晒木棉衣

夜至馬陵

苦霧噴沙氣若蒸荒程月黑夜無燈前岡十里黃茅路
野火光中見馬陵

滕縣

客從宿遷來日日灌莽裏今晨到滕縣孔道平如砥民
居稍稠密田野亦耨理疎樹排棗梨短樊插棘枳雞豚
飯商賈葱薤飽婦子居然似樂國以彼乃形此滕當戰
國時褊小五十里自從置郡邑其大實倍蓰縣令視諸
侯提封非昔比西南際蕭沛豁達開顧指回頭淮泗郊
窪若陷井底可憐百萬戶頗爲蛟鱷徙山東地勢高厥
患不在水所期一尺雪二麥青可起

山左自四月
至今苦旱

嶧山二首

泰岱分餘脈差堪比附庸祇因生下邑讓爾作奇峰
作俑何人始吾將罪李斯如今山上石多刻去思碑

滕鄒

之開丞尉以下
俱勒石頌德政

過兗州城外有感

泗水橋西路垂鞭去意遲
老爲東郡客才減少陵詩
白日黃塵暗孤城萬木悲
遺民應已盡莫問亂離時

冒風過東平州暮投張秋鎮

沙旋頭疑眩聲喧耳欲聾
不愁衝凍雨直怕遇狂風
土鏗煤烟黑爐灰豆火紅
老妻加被絮今夜奏奇功

館陶早飯題壁

楊椿迷野岸棗刺拒城壕
小縣門常閉紆途僕告勞
半窗東日暖一飯北風饕
聊記吾曾到留詩過館陶

大風至鄭家口

黑雲奔騰西北來平地忽陷山疑顛簸揚砂礫作糠粃
雜以萬斛葭蘆灰陽鳥退飛翅摧折天狗下墮聲喧豕
千年樹拔虎豹窟四海水立蛟螭堆我行到此迷失道
馬立岐路鳴徘徊意中了了識村落目所未見終疑猜
夕陽乍吐鄭家口豁若明鏡函初開半年遊跡入醉夢
下馬更盡當風杯

四月十五夜奉陪徐座師於此地看月故結處及之

戲題旅壁畫龍

誰言尤物性難馴長養方成爪角鱗畫手不然爭貌得
可憐曾傷豢龍人

野氣詩

朝陽射北陸野氣何迷濛忽生無根雲幻作有影風云

云水波去冪冪村烟封千林皆動搖四顧爲虛空我聞
氣升降閉塞方成冬而此從何來吹萬將毋同大哉古
今宙都攝一氣中鉅者運鯤鵬細或吹蠛蠓試從一身
論可以究始終恢恢賢聖途剛大秉降衷養之塞兩間
浩然靡不充若者爲正氣仁義澤厥躬反是則爲邪百
感交外攻五事協五行輕清秀所鍾不鑿渾沌竅自然
得玲瓏若者爲清氣視明旺亦聰反是則爲濁人心有
盲聾生氣眎初發萌芽葆菴蒙不敢輕散抒所以厚蘊
崇若乃礪咲刃旁開騁談鋒是名曰殺氣取快誰見容
朝氣爽且朗古鑑磨青銅不事察察明謙謙與人恭其
或長傲慢鴟張徒子雄是名曰暮氣衰至驕必叢凡此

機相關動與呼吸通不知野氣者其類當奚從或如葭
蘆灰候至應管筒或如古井水冬暖冰常融然而無附
著所向皆游蹤於人似客氣往來日憧憧熏面使黧黑
醉顏發狂紅移之入金鬢饋餽侈然豐移之襲官骸咳
嚏歎霾冱又疑天壤內物理難終窮蒸沙詎成搏煮石
豈得鎔受性不受氣造化誰尸功不如且坐睡萬象歸
朦朧

趙北口坐冰床

古堤老柳一時僵水腹初堅黑白洋稍與長途休馬力
冒寒半日坐冰床

白溝旅宿感舊

南北勞勞已十霜瓦橋關外又嚴裝今宵新月入窗早

去日小鬟如我長斑髮重來無伴侶

甲子入都同錢玉友翁樹服已巳則

家次空陳元之庚午春同姜西溟南歸甲戌復偕翁康飴輩北上皆宿此店

舊題幾字失偏

旁燕南酒美魚羹賤不解愁人獨憶鄉

立春日同愷功侍講作即用敝裘二首韻

土牛寒氣漸應捐猶戀征袍未拆綿東閣探梅還有信

西堂夢草獨無緣

憶德尹

春生帝里如相就老傍侯門越

可憐南去北來成底事暗消髀肉是今年

逝水流光黯自知依然一室對烏皮冰將釋硯真吾幸

雪可搏獅任客為老柳受風終蕞約孤松經凍太離披

詩從鍊後鋒銜出正要旁人摘小疵

再疊前韵示愷功

半生習氣老來拊熨貼終輸裹鐵綿待兔祇疑株可守
求魚方悔木難緣偶然鴻爪留還去果否蛾眉妬是憐
一種東風消不得鬢邊霜雪又增年

海内人才略可知也曾高會與南皮三年刻楮將安用
一技雕蟲壯不爲酒市天寒愁客散書帷晝靜喜人披
與君相對春風裏只有冰壺不掩疵

讀白奔山人詩和愷功三首

亭長臺邊一酒徒仰天故作大聲呼氣驕星宿生芒角
手擎山川入陣圖急縛何人櫻怒虎叢祠有鬼托妖狐
眼空江表衣冠族搖筆猶堪殺腐儒

人謂狂生本不狂
漆身吞炭事何常
亂餘賓客搜亡命
赦後英雄耻故鄉
寶劍塵封三尺水
麻鞵寒踏九州霜
隨身一掬瀾
翻泪不哭窮途哭戰場

一卷頻浮大白開
即論詩句亦雄才
到天峭壁千尋立
破浪長風萬里來
石火光中亡國恨
鐵函井底後人猜
可憐芒碭無雲氣
山色於今死若灰

酒人集

起乙亥正月盡六月

甲戌偪臘抵都偕家聲
山僦居宣武門外與姜西
溟惠研谿寓舍相望自
新年始約爲詩酒之會
吳中則唐實君趙蒙泉
海陵則宮友鹿七人而已
湯西厓錢木菴亮功兄弟
時或一至後益以翁康
飴

陳六謙狄向濤楊端木稱爲好事所傳他有宴會
牽率入座大約月必有集集必有詩聲非擊筑名
托酒人各有取爾也

西厓四十初度援筆爲壽兩人交誼畧見於此
非祝嘏之詞也

甲子夏五月我初客燕山逢君槐樹街披豁示肺肝君
時二十九譽滿公卿間我長慙七年姓名尚泥蟠居然
荷兄事齒序非所安因緣求友生稍使徑路寬寧知遇
秋賦別足同蹒跚古寺郭西門頽虬柿垂丹霜天夜蕭
槭落葉堆空欄男兒屬有才九萬紵鵬搏向來輕薄子
洗眼爭相看我時仍失意寸進弓難彎不敢怨窮途借

君激頽頑長恐命運薄終身比劉瓛音桓皇天困斯人日

月雙跳九丘壑閑雲霧江湖駭驚湍側聞夙昔遊一一

趨金鑿如君尤聳拔刷羽超鶴鸞落筆中書堂集賢群

聚觀大官饌常賜內府金頻頒 至尊賞文辭步接螭

坳班猶能念微賤枉札來榛菅感君期我深暴棄難自

拚勸我舉京兆送我赴春官憐我下第歸臨岐話悲酸

誰當旣得路枯苑仍相關長途冰雪交鶴語今年寒還

家席不暖又鞞衝風鞍人皆嗤此來此來豈無端君年

適四十正及叨杯杵君壯騰青雲我衰改朱顏詩成非

善頌聊記平生驩

元夕前三日飲惠研谿寓齋與錢王友亮功分

韻

春寒半月透重繡曲巷層冰凍尚堅策蹇人尋行樂地
快晴天趁挂燈前侵陵白髮違歌酒惱亂朱門涕管絃
誰似閒官能愛客朝衣典去作新年

與陳六謙戶部話舊

二十年前兩酒人京華相見意尤親田園斲返如孤客
邸舍翻來作近隣難就微名成我懶未除宿習取君真
狂言自駭家僮聽誰識忘形舊主賓

上元夜同唐實君趙蒙泉宮友鹿家聲山飲姜
西溟同年寓分韻得雨字

北風未解嚴刮面射強弩富兒馬足塵游子衣上土我

有同年生一椽望衡宇每因赴讌會暫得命儔侶時節
近上元滿城竟簫鼓公卿例名客儂拍畧可數燭幌白
生虹燈屏紅窄堵空明大圓鏡爛熳散歌舞可憐玉川
居破屋用茅補荒庭一堆雪月色帶清苦也復呼其群
經營同地主不辭口腹累爲愛風義古酒行爵踰三斛
列簋倍五先生鄙肉食下箸輒欲吐如何點食單亦溷
烹魚釜西溟性不嗜肉或誤食必以清水灌盥而盤餐乃具此味即此毋已奢誰能
諒貧窶我窮興蕭索藉爾作豪舉雅令旣匝巡毋陣捲
風雨主人但旁觀堅坐恣狎侮肯爲餅告罄相勸力須
努新詩信手成險韻鬪虢虎費君三月俸醉我一夕許
忽聞耳熱歌寒律變温煦

王赤抒新葺一齋名曰野航邀余對酌出詩索

和卽次原韻

忘機到處總虛舟別起齋名借櫺頭已是除塵得瀟洒
若教臨水更清幽兩三人可同君坐五六年應爲此留
閒殺鷗邊好風景荷塘宜夏蓼宜秋

白田喬侍讀有家伶六郎以姿技稱已巳春

車駕南巡召至行在曾蒙天賜自此益矜寵

庚午四月余從京師南還訪侍讀於縱棹園酒
間識之有青衫憔悴無如我酒綠燈紅奈爾何
之句時東海徐尚書射陵宋舍人慈谿姜西溟
俱在座相與流連彌夕而散去冬北上重經寶

應則侍讀下世旅櫬甫歸余入而哭之盡哀何
暇問六郎蹤跡矣及至都下聞有管郎者名擅
梨園一時貴公子爭求識面花朝前八日翁康
飴戶部相招爲歌酒之會忽於諸伶中見之私
語西厓曰此予何其酷似白田家伶蓋余向未
知六郎之姓也西厓旣爲余道其詳竟酒爲之
不樂口占四絕句以示同席諸君

鬢影衣香四座傾風流爭賞米嘉榮就中獨有劉賓客
曾聽涼州意外聲

鴨桃花外小池臺漱灑觥船一棹開春色滿園人盡妬
君王前歲賜金來

荷葉宮言其卷十九
一 群穠艷領花曹頭白尚書與最豪記得送春筵畔立
酒痕紅到鄭櫻桃

茶烟禪榻隔前塵存歿相關一愴神自琢新詞自裁扇
教成歌舞爲何人

題楊次也所藏朱北山墨繡球花

春風壓簾吹不動簇蒂攢莖密無縫美人纖手搓欲圓
嬌鳥一梢低更重駢枝倒挂玉蕊仙暖氣散作藍田煙
粉痕洗盡墨光出自有此花無此妍

花朝實君招同西溟蒙泉研谿西厓友鹿聲山

寓齋雅集分韻得過字青字

二月無花看今年雨雪多不辭宮獨冷翻喜客頻過洒

掃門庭潔芟除禮法苛愛君新句好諷諭擬元和
客久頭垂白交深眼倍青坐銷愁裏日來聚酒邊星假
借通隣曲盤餐及使令春郊花事近後約更旗亭

題項霜田讀書秋樹根圖

讀書未必皆識字涉獵耳目爲窮探此生枉伴蠹魚老
飽蝕卷帙寧非貪文成有韻或吞剝事出無據徒撻擗
孰從牙後拾王李纖入毛孔求鍾譚橐駝馬背所見少
自享敝帚矜著簪雷同不滿識者笑人盡能此燕無函
蘭苕翡翠稍秀異什伯略可數二三時情祇取供近玩
崇雅刪鄭誰能諳我持此論衆大怪相戒勿聽無稽談
廿年硯田困衣食撥置夙好隨嬰媿排辭偶句受人役

渴飲墨汁同潘泔有時間作崑強語蓼辛荼苦終非甘
項生乃有嗜痂癖謬辱推許張頤頤謂余頗可附同調
與別白黑分青藍君才於世故無匹氣象外拓神中含
屢遊京洛結文社獨向魯國稱竒男空拳亦足搏犀兕
大鼎詎止容罍甌一鞭入海走巨石千丈倒壑回枯枿
逍遙鸞鶴控紫極活潑魴鯉游澄潭才高氣盛心轉細
獨繭一一絲抽蠶問君此境豈易到確有階級難匆參
向來正得讀書力閉戶萬卷曾沈酣源流正變瞭指掌
北斗在北南箕南光開飛電十行下機發伏弩千鈞擔
搜竒抉險富詩料然後所向無矛鏃庭空樹老得秋早
霜色染葉黃於枿一編信手愛露坐何用白石藏書菴

命工作圖索題句
劇壘相對吾奚堪
遇君尚應三舍避
君愈降氣余彌慙
詩成乞與摘紕繆
寒鈍猶異隨驂驪
此間風景有何樂
曷不歸去同書龕

料絲燈史畊巖學士屬和即次原韻四首

勿論萬縷與千絲
似密還疎製絕竒
玳瑁筵前凝作片
珊瑚網底爛生枝
華堂金屋年年換
錯綵粧花種種宜
表裏孤光原洞達
瞢騰醉眼任斜窺

宛宛長廊小院東
藕絲不斷望疑空
巧穿針孔玲瓏影
吹透冰肌綽約風
簾幙花深長帶霧
畫圖山淺忽生虹
琉璃太脆紗紋薄
獨愛韜光黯淡中

更從何處着纖塵
亞字文廻古錦茵
斜拂楊條藏語鳥

密牽苔綫過游鱗顏筋柳骨書家格吳帶曹衣鏡裏身
併作清輝開四照不勞明月吐芳津

駢枝儷葉技同稱點墨何愁誤不與射角星芒殊
照人風骨自稜稜金波蕩月成方折玉氣生烟隔幾層
還與石湖添紀事詩家新賦料絲燈

范致能有上元吳中紀事長律所載

燈名甚多獨不及此品

友鹿寓居孫公園與實君蒙泉柴木同巷僕及
西溟聲山相距稍遠友鹿作比隣詩二章亦來
索和因次實君韻奉答

馬蹄纔過又車輪廣術相逢亦太頻不惜往來隨步履
預防倡和損精神過墻濁酒能供客鑿壁餘光倘借人

便與中央成鼎足姜居西舍我東隣

時余移寓琉璃廠東

造門不見等離居俗例持牢急破除

余兩詣友鹿俱阻于闈

僅約

一條申典謁客談幾處省傳書巷連畢曜宜相就雨過

蘇端肯見疎添取新篇為日課與君直似共鄉閭

友鹿復次韻見寄恐其有過督司闈之意再疊

韵解之二首

過門何止十朱輪只有窮交不厭頻語帶滑稽吾是戲

弊清摘發爾如神犬應勿拒重來客花亦爭窺舊識人

從此得閒須徑造巷南巷北總芳隣

老屋西頭勝儻居門前無草不須除未妨排闥來驚臥

且喜還甌肯借書踪跡漸同詩境熟形骸終要禮文疎

他時野老曾爭席記得漁樵狎里閭

盧樛菴七十壽詩

我愛盧仝居翛然數間屋先朝孝廉宅過者猶屬目再
傳世其家門徑不改築一經稟庭誥自教兒郎讀早年
赴舉場高步矣馳逐同儕重先輩子弟尊者宿正坐業
太精翻令身久伏科名人拾芥官爵鶯遷谷白髮迫衰
年青衫自初服神恬遜無悶學殖富有蓄紅扶壓架花
翠擁遮隣竹刻鳩拄杖頂放鶴前山足世自閑如蛙吾
方靜如鵠回看軒冕客萬事徒碌碌分定兩不爭生涯
籌已熟

送勞書升通政眷親歸里

吾鄉前輩楊司馬曾脫朝衫換彩衣祖道回思十年事
都亭又見一人歸白雲去國情相似黃髮吳親古亦稀
不是明時輕解組五湖烟水屬春暉

豆腐詩和楊芝田宮坊四首

服食神仙事不難磴牀幾轉便還丹

世傳淮南以丹藥點成

凝來

石髓風猶嫩點出春酥露未乾倒篋易償隣叟值顧名
原合腐儒餐人間賣菜多求益休與先生溷一椀

蛙瘦熊肥兩不知太常終歲是齋期半炊土竈然其火
一頃山田種豆詩饗子貧家先染指厨娘纖手並凝脂
來其鄉味君休咲三德虞家有贊辭

事見虞伯生集

滑可流匙勝冷淘不爭舌在齒牙牢渾忘肉食聊名儉

偶佐村沽亦足豪烹雪也宜施翠釜割雲初不費銀刀
胡麻別試山僧法口腹窮奢笑老饕

茅店門前映綠楊一標多插酒旗旁行厨亦可咄嗟辦
下箸唯聞鹽豉香華屋金盤真俗物臘糟紅麴有新方
須知澹泊生涯在水乳交融味最長

問西厓病

小閣藤牀勸獨憑門前仍遣小僮磨一家多累愁何益
四海無醫感又增春酒呼兒看滌器夜碁留客對挑燈
可知七發真良藥莫謂先生病未能

戲題曹希文寫生蒲萄冊

東郭鹽咸陽治朝入羊暮騎馬生不願封萬戶侯亦不

願領西涼州但願蒲萄垂乳比桑甚日日飽噉只學林
間鳩若使一官值五斗家家爭釀蒲萄酒枝頭無紙上
有誰能截取老僧手

圖為鑒上人
所畫

再題朱北山所畫松鼠蒲萄

兒童把竹竿飛鼠未可逐暮四復朝三蒲萄秋正熟縱
使身輕化蝙蝠可憐兩翅仍兼肉枝頭漸空莫緣木明
朝去竊官倉粟

為次也題秋花小鳥畫卷

一株鴨脚葵色映紅黃紫雞冠似經鬪碎葉垂披靡無
端青螳螂失勢忽落此當其奮髀時寧料草間委飢禽
不汝費集啄紛爪觜似為蟬復仇反覆乃物理二蟲何

厚薄是亦可以已我欲解其圍毫端呼不起

研谿傳札訂望後出郊看杏花夜來微雨恐阻
茲遊晨起風日晴明喜而有作

臥聞檐雨滴堦鳴意外東風曉放晴爲作報書貪早起
門前吹過賣花聲

送畢雨稼

古藤花底逢朱十爲我長吟畢四詩滿眼酒徒星散盡

送君還憶君時

余初識雨稼於竹垞先生寓

三月十六日同西濱實君蒙泉研谿六謙端木
石城友鹿永年向濤霜田亮功次也南陔至興
勝寺看杏花三首

弄袖風微不起沙野田分路走三鷗十年失計仍爲客
一醉無名特借花白塔似招遊子騎青旗錯認美人家

金丸落處休輕逐小立逡巡避鈿車

先經摩訶菴不得入

幸是韶光處處同勝遊隨意轉芳叢別開香界松林外
遙指烟村杏社東黛色濃添三面綠日痕微減一分紅
只須十步凌丹閣多少花頭在下風

及記當時載酒游舊題幾壁拂塵留重隨客到僧猶識
不待人言我欲愁牧笛聲中芳草路鞭絲影裏夕陽樓
花開花謝年年事豈料傷春易白頭

看花之會已成七律三章朝來耑未分牋屬賦

七言歌行再作一首

朝陽簷前報乾鵲起赴城西看花約東家借得蹇驢騎
快比揚州身跨鶴豁然雙眼對明鏡草樹無塵光躍躍
倚牆初見一梢紅掩映垂楊作村落漸行漸遠入佳境
花海茫茫浸樓閣雲晴霧散天微霞日色烟光互迴礴
自然得氣少人妬縱使餘寒何處着卯酒消來玉頰鮮
牙香熏透春衣薄蝶沾葢粉或雙去燕拂花鬚時一掠
乍看半吐或全開百回疑聞腰鼓作因思前夜沾沙雨
特爲催花龍起壑不然万本及千株那得同時齊破萼
此花舊是仙家種肯向人間傷簾箔自從禁苑植樊籬
已勅居僧司鎖鑰寺後爲進御菓園兒郎避路歌巾帽嬌女窺
隣少媒妁可憐寂寂寄空園也似飄飄客京洛憶昨初

來年尚壯歡場徃徃貪酬酢松林古寺摩訶菴幾度陪

遊履相錯

乙丑丙寅間屢隨大司空朱公少司馬楊公遊此

侍郎歸老尚書歿

前輩風流久寥廓我留紫陌十經春白髮隨梳旋墮籜

去年三月曲江宴橫路紛紛爭出郭此時搗礫更思鄉

未免當春懷抱惡豈如今年風日佳得喪心空別開鑿

青袍莫漫感憔悴紅袖羞堪慰淪泊楊家公子好心事

兩世交情宛如昨已逢勝侶盡名流况是閒官能脫略

雖云雅集忘賓主治具終煩佐脾臆

是日端木治具

花前醉倒

十五人坐有車公寧不樂歸來忽忽記前夢後會悠悠

付成諾禪房借榻眠海棠野圃穿畦行芍藥勿嫌生活

太冷澹竿木逢場聊戲劇只愁火急促新詩顏謝方將

被陵轢尋花本意取陶寫覓句翻教困悉索直須境過
兩相忘滿紙陳言總糟粕

狄向濤庶常訂同人會飲海棠院是日僕適有
他招別請卜期研谿以詩相恼戲荅之

一春命侶原多暇半日看花奈少緣我為顏唐姑避席

讓君獨作海棠顛

出劍南集

三月晦日向濤治具招同西溟實君文饒研谿
六謙耑木霜田亮功次也南陔岱瞻宗岱社飲
寄園向未與會而今至者則胡芝山周漁璜張
天門陳堯愷姚君山玉階兄弟

客居感節物鄉味想櫻筍及此問名園忽驚春向盡歎

鞍垂柳外曲徑紆徐引側帽入丰茸迴身轉欄楯群賢

次第到虛坐前後盡

出曲禮讀上
聲俗作儘

衆芳如媚客四顧少

畦畛丁香垂紛披藤蔓縮菌蠢海棠不少待吹作胭脂

粉那無水一池鼓吹出蛙黽似嫌太寂寂作意破寒窘

鯨波捲百川目眩空花墮亭臺亂金碧有若浮海蜃日

飲正無何老狂良足憫唐侯但坐視出語顧見哂

余與
天門

亮功鬪酒盡酣實君
有老馬入駒群之戲

幸無性命憂何用須臾忍春衣行

且換紅藥期將近三百青銅錢敝裘尚可準

陸澹成侍讀招飲丁香花下同西溟崑繩寄亭

作

花繁葉密暗迴廊為放庭空特撤牆翠幕雲遮天四角

紅燈人醉樹中央春辭小院離離影夜受輕衫漠漠香

曾是往年連榻地重來容易感流光

丁卯巳巳間與家
荆州兄盤桓此地

最久故
及之

何倬雲戶部招諸同人飲藤花下

前日飲寄園自辰徑終酉連朝發酒病解醉仍思酒一

笑赴佳招相逢復開口入門庭宇曠槐陰寬半畝高格

架藤花有若魚貫柳其梢多倒垂其蔓必上走蛟螭起

拏攫纓絡飄絲絡翻愛急雨來不嫌濡我首殷勤得賢

主諧謔因良友衣上指唾痕花前傷老醜人間好亭館

豈必皆已有但願興到時深杯長在手

四月八日飲劉雨峰新寓分韻得佳字

十年論舊雨一日破清齋

俗傳浴佛日

去覺流光速來貪小

住佳

時出乙丑讌集詩卷見示

槐陰深小巷花氣近斜街早晚南船

到重看酒似淮

題張浦畫太白像

芒角生酒星仙才謫人世清平三絕調醉裏一噴嚏可
憐高將軍不中作僕隸脫却夜來鞞飄然從此逝

題張儀山中丞溫陵紀事後

見說溫陵事安危繫一時潮頭開郡縣虎口奪嬰兒報
國原臣分封侯豈數竒置身如事外不勒紀功碑

贈范方仲

秋兔千頭瘞禿毫鋒藏鐔斂似無刀費他京國三年住

頑石如山價盡高

為翁景文題畫

綠蕉葉折風無賴
紅蓼花垂雨不情
一個草蟲鳴似訴
故來紙上作秋聲

宣德素鼎歌為山左李繩其作

西方金苗變黃白
躍冶長砂歛成赤
神工范出形製奇
不用雷紋鑿饜饜
腹圓口直中央歛
一綫縈腰起凹凸
其高四寸下半之
其厚三分旁稍溢
以衡測重斤踰二

宣德小爐重者
不過二斤四兩

以指量圍弓滿的寶光蒸出耳雙環濃

乳垂為足三隻膏流似覺層波涌
肌潤何愁熾炭炙瓊瑰碾紫柔
作團鞞鞞凝紅嫩將滴照來妖
魁影吹

過雲烟不留跡神光離合乍陰陽氣候盈虛異晨夕世
人好古搜彞敦耳目遺亡闕金石此鼎傳從宣德年居
然上與商周匹國家元氣在宇宙百鍊千鎔聚精液後
宮侍女罷添香講殿中宵尚前席曾從天上拂袍袖一
落人間似淪謫忽經吾眼真可憐尤物無多增戀惜君
不見城南片雨朝來急電掣金蛇飛霹靂玉川破屋那
許留万丈光芒穿四壁

翁康飴寓齋看芍藥分韻得面字

都城洵繁華物色互矜銜豐臺紅芍藥千畝開芳甸嗟
爾本名花因多乃致賤半開遭天闕不許遊人看却被
賣菜傭頃筐雜藜莧根株兩相失本性須臾變相逢衢

陌中識者爲一泫翁生官戶部邸舍如郵傳近移槐樹
街意取買花便連車載兼土愛護同婉孌小雨爲扶頭
清泉與醜面瓦盆三十六手自摩挲徧亞窗斑竹欄步
障青油綸花如感知遇爛熳答深眷其大比盤盃或歆
學團扇高低隨所主向背視所戀負恃各爭妍誰能分
最殿豈無一尊酒就汝諧終宴未免爲紅筵經營好希
簞書生例貪嗇耳目有歆羨學道吾未能紛華易交戰
有情且相對卽事驚稀見絕勝洛陽園花時閑深院

送趙二聞郎中分巡兗東二首

望郎才地早知名檠戟新臨古任城負弩三州迎刺史
降階一揖禮諸生山連翠岱雲常潤濟入黃流派獨清

我是南池舊遊客送君不覺動吟情

君家邸第好園林槐柳周遭十畝陰子舍縱牽他夜夢
宦遊何負老人心共傳清節胡威絹自有家風趙抃琴
此去國門看擁傳拾遺親授大官箴

送鄭禹梅郎中出守高州三首末章兼示茂名

宰王令詒

高涼名宦自來無君到方能重此區不信試徵唐宋事
潮州韓與惠州蘇

八十高堂兩白頭扶攜齊赴上瀧舟荔枝龍眼均珍膳

不要同官易播州時范國雯得延平故及之

曾依日影候花甌此去人情似左邊猶勝茂名王大尹

脚靴手版謁同年

王與鄭皆戊辰進士而茂名爲高州屬邑

送陳梅溪之任階州二首

一家鼎盛十朱輪仕籍君偏比積薪早歲科名曾入洛

半生官况兩遊秦

陳前任綏德州牧

時平不設當關戍路僻稀

逢入蜀人鄧艾城邊間草木也教窮谷識陽春

一官聊與俗沈浮不改頭銜計亦優稍喜分符同領郡

敢論無蟹有監州重關夜度群雞月絕塞書來斷雁秋

多少郎潛愁索米羨君已似跨青牛

古詩五章呈吉水大司空李公

盛治際中天六卿盡文獻發揮爲事業器量隨所建公

雖長冬官其氣實涵萬放之彌宇宙舒卷視膚寸道在

本非夸逢時獲初願

百川日東注赴海同一門
豁達意何廣函容道彌尊
乃知延攬塗中有仁義存
清濁具本性澄觀得其源
君看下成蹊桃李初不言

西江一瓣香自昔人文區
歐公門下客磊落皆名儒
千秋復代興隻輪賴公扶
官高能下士此義今人無

空谷有幽蘭披披自含芳
一朝采而佩顧盼滋容光
顧盼何足多貴登君子堂
識者或見賞當門忌孤芳
向非特達知標榜慙互相

男兒感恩地茲事豈可常
不敢泣窮途恐爲知己傷
拙守無詭遇異營戒岐芻
百年屬有身利鈍誰能量
於公

負期許脈脈終難忘

次也讀書王園夏日偶過之索詩題壁

地僻人聲覺林深曉氣通
棗花開帶刺藤角墮兼蟲擊
柝過佳客傳餐累小僮避炎知有處來就北窗風

虞山巖杏修為尊人仲甫先生乞六十壽詩并
以錢湘靈玉友亮功所賦五七言長篇見示故
詩中並及之

吳中數交遊屈指首嘗熟錢生十年舊直以心置腹因
之策同人京洛異徵逐初逢嚴伯子氣靜神冲穆涯涘
未易尋徐徐視含穉名駒果有自孺染出家孰字有兩
老親筭旬竝踰六昨歸為上壽再出何太速所傷名未

成負米營斗斛此來復相見執手語反覆為言屏幃詞
排偶難破俗人間好官爵祇用填滿幅不敢濫乞言所
以省干瀆君詩有真味是則我所欲出示三長篇得隴
且兼蜀孝廉筆竒矯榦老枝葉禿交情叙三世中有滄
桑錄大錢善形容繪畫列眉目小錢騁才氣汎濫到朝
局已無餘地留故乃相迫促吾詩何處著譬若蛇添足
然而難固辭即事生感觸江南氏族盛甲第紛相屬寧
知一再傳竟為他人卜君家好門閥墻宇本先築豈非
文靖公清蔭及喬木

仲甫為相國
文靖公曾孫

當時歸逮養歲給大

官祿人生惟此難餘者徒鹿鹿即今時代換往事如轉

轂正賴後人賢流風承式穀先生實高隱祭酒推鄉曲

雖荒下溼田尚保檀橋屋時情有豪奪世守無輕鬻冬
缸葑可熬秋圃棗堪剝窺池荷夏紅掃徑莎春綠平生
十萬卷又課諸孫讀同牢四十年尚享齊眉福子行及
歸奉此樂天倫獨古人重名義飲水兼啜菽斯言倘足
徵庶當嘏辭祝

酬同年張聲百秦中見懷之作

舉子稱同年厥名自唐始其初本鄉貢往往維桑梓地
近情易親論年序以齒師門就行列有若一父子名雖
托友朋骨肉差相儼至於試京兆半屬九州士或者徇
虛聲紅箋報名紙泛交乍隨俗相背旋棄屣刺盾動以
矛憑身孰如几余生久落魄場屋困別趾初度降惟寅

微名歲在癸秋蛾眉換綠看鏡抱深耻得附當代賢不

才聊自喜君家好兄弟

令兄逸峯亦同榜

健翮冲天起竇桂有

雙枝田荆必連理京華獲交臂伐木酒親醜古道朗照
顏相期各劇壘嚴霜妬竹柏猛雨欺桃李散作湖海萍
流行隨坎止省親君就道落第我歸里關城杳何窮秦
樹吳雲裏何期再入洛冰面躍雙鯉寄示長歌行光芒
開顧拍聳身登二華長劔插天倚黃河如修蛇起伏見
首尾自然得竒句萬象聽驅使我欲從之遊塵埃誰料
理矧慙詩力弱難與諧宮徵遲答故人書半年坐嬾耳

以詩乞王麓臺給諫畫山水

婁東富文獻世守鄴侯架太原老奉嘗腕底斡造化當

年書畫蹟貴豈文董亞至今賢子孫餘韻足瀟洒黃門
 蚤登第群從俱方駕朱紫接烏衣丹青陋曹霸朝廷無
 闕失邛舍多清暇坐令拾遺官風流資醞藉時時出餘
 技落筆妙天下屏幃滿京華林泉不吾借篋中一幅紙
 欲乞防見詫生平山水緣無厚入有罅搜竒得餘快歷
 險慣不怕所媿言少文烟雲經眼乍如何不自量見彈
 求鶡炙意從良友申間請掖垣假朝來傳好語命以詩
 易畫余以宣德紙從吳元朗轉乞君畫君語元朗是不可無夏重詩詩來則畫往矣我詩頗拙
 速敢托不敏謝古人重踐言相值寧論價君其勿堅壁
 致我長避舍

附次韻

王原祁

龍山查先生峭壁青松架讀書百錘鍊等身與古化
清健更瑰竒韓蘇之流亞興來爛熳題珠玉繽紛灑
余聞心折久畏友敢並駕霧豹窺半斑騷壇戰而霸
欲爲訪戴遊一官苦無暇坐令鄙吝生他山何所藉
小技試盤礴每耻唐人下粉本追宋元筆墨四家借
腕弱媿癡肥定爲識者詫譬彼窺月魄餘光逗壁罅
慘澹心神疲甘苦方知怕開闔變化間微茫得失乍
始覺吾祖高至令人膾炙拙筆非許田奚爲拱壁假
眞宰雖難搜勉力爲君畫木辰配瓊瑤何以云報謝
荒率懼覆瓿賴公以長價紈扇懷袖中秋風弃上舍
次日麓臺爲余作巨然山水并次昨韻見誚再

疊韻奉謝

玳瑁裝書籤珊瑚供筆架我無二者樂宿習故難化新
詩出寒窘郊鳥或流亞一窺著作堂顏汗豈勝灑千金
享敝帚蹇足追高駕何異貧家兒蓬頭媿王霸方當苦
酬應供給日不暇先生地望懸乞者無憑藉十年率未
應惜墨膏輕下始知高人胸與俗少假借於余獨不靳
脫手洵竒詫用意取巨然危峯拆天罅趁人何窾兀旁
睨心膽怕細觀入秋毫恍若置身乍漁灣舟可檣樵徑
轂可灸勢成風雨晨不待休沐假猶嫌尺幅短更以詩
補盡人間有真境躡屐當追謝但恨多牛翁青山索高
價菟裘營已晚惆悵道旁舍

王服尹見和乞畫詩三疊前韵奉畬

米家書畫舩秋蔭傍藤架為君下一榻四壁烟雲化

服尹

詩下榻麓

臺齋中

京洛少名園精廬乃其亞可無一斗墨興到

供揮灑君才况如江衮衮高浪駕偏師歷小敵勢欲戰

而霸篇終味深穩語妙神閒暇平生績學功授受有承

藉淵源大可溯派自震川下幸生君子鄉師友不外借

何當謬引重恐被識者詫昨日乞畫詩細聲風出罅蒲

牢懸我前欲扣吁可怕強顏托夙契結襪交非乍憶昔

隔牆居淋漓濡酒炙

已巳寓居上斜街與孫愷似
編修近隔一垣長從服尹飲

六年

一醉夢歲月不我假青山憔悴容此景豈堪畫君歸約

髯孫吾亦偕小謝

來詩及家德尹

披圖賦招隱尚可長詩價忍

負好溪山挑燈向客舍

計閻昭索題看菊圖

勸君莫種菊種菊須澆灌本自隔年培根從立夏判苗
新虞蠹蝕葉密防雨爛三時倘失勤那博一秋玩不如
走廟市取辦在一日捧土上瓦盆妍媸誰復辨十年客
都邑萬事皆眼見披君看菊圖使我發長嘆

題曹渭符舍人畫扇

移得城南魚藻池便從紙上寫淪漪畫師正恐妨魚樂
不着飛來雙鷺鷥

費子葛陂屬題小影

費生客京華氣帶秋山爽學詩兼學畫離俗寄幽賞識

君塵埃中十載一俛仰羨君烟霞姿瀟洒不殊曩虎頭
爲寫照見者皆拊掌秋根走雜樹中有落葉響可無松
亭亭配汝玉朗朗勞生輪下坂歲月成鹵莽誰知靜坐
人一日可當兩

題趙天羽給諫小照

長身七尺紅兩顴成佛要在靈運先兩塵相隔一毫末
中被官事相糾纏豈知生來具慧業即現宰官爲說法
一林紫竹是禪機只在眼前誰見曉

送同門朱介垣掌科請假還吳

燈簾夜看秋菊花酒徒爛醉東西家竹垞去官君請急
近社花開少顏色明朝我亦作歸人二老猶堪結比隣

扁舟同訪籬邊屋及取霜前香稻熟

希文將南歸次淵明田居詩韵來索和章四首
故鄉去我遠縹緲三神山風塵一涉足忽忽傷徂年曹
生靜者流心若珠在淵不使閒草木萌芽荒寸田如何
瀟洒姿亦復趨人間一官比薪積後至爭居前坐着車
馬衢群情動如烟秋風夜入戶曉鏡增華顛身先候雁
翔心與浮雲閒歸期服勇決臨別翻欣然

老馬悔識塗亞身受羈鞅時因送人處一發田園想田
園近荒蕪計拙迷孤往家書昨日到久雨蓬藿長八口
恒告飢憂來難自廣生涯事游惰獲報宜鹵莽

萬人浩如海酒伴日以稀曹生後我來今復先我歸家

人占喜鵲不寄秋來衣因之報歸信歲晚寧相違
讀書三十年如農守阡陌出門視蒼莽感是靡所適君
看入貲郎朝發不待夕時來誇際會抵間快投隙得官
如驅羊舊給廝養役課奴力耘耔課婢勤紡績識時乃
豪俊章句工何益

敬業堂詩集卷十九